

सांगठनिक नेतृत्व ता समस्यांग



कामरेड स्टालिन
गोंडी अनुवाद - जनी

सांगठनिक नेतृत्व ता समस्यांग

(रूसी कम्युनिस्ट पार्टी बाल्शेविक कांग्रेस काजे

कामरेड स्टालिन ना रिपोर्ट)


ओसो उचुन लेखकु

सांगठनिक नेतृत्व ता समस्यांग
(रूसी कम्युनिस्ट पार्टी बोल्शेविक कांग्रेस काजे
कामरेड स्टालिन ना रिपोर्ट)

हिन्दी अनुवाद- पारदर्शी नीलाभ
प्रभात प्रकाशन
दंडकारण्य कमेटी
पहला हिंदी संस्करण - जनवरी 1992

पहला गोंडी संस्करण 2021
गोंडी अनुवाद - जनी

*sangthanik netritav sambandhit samsyang, by Stalin,
Gondi Translation by Jani*



У. Гамма

पार्टी सदस्य, पार्टी ता आंतरिक लोकतंत्र ता परिस्थिति ते पार्टी नीति ना सब्बे सवाल कुना स्वतंत्र ओसो नियमबद्ध वाद-विवाद नइमा पुट्टितोर, शिक्षित अनि मजबूत आंतोर। इद्रम आयनास्केने पार्टी नीति ता मूल समस्यांग नल अलग आयना, पार्टी नीति किन गलत तरिका ते नष्ट कियला काजे समस्यांग ना वाद-विवाद ता फायदा एतना, पार्टी नेतृत्व किन नुक्सान कीयाना ओसो अदिना सुदृढ स्तर तुन बिगड़े कियाला विरुद्ध सख्ति ते संघर्ष कियाला तैयार आंतोर। पार्टी आंतरिक पिस्वल ता अनुभव मना किन बातल तोहिंता इत्तेके मना पार्टी स्तर मना पार्टी नीति तुक अलग आत्तोर। लेनिनवाद तल अलग आत्तोर ओसो पार्टी तुन सुदृढ ओसो एकीकृत कीयाना संघर्ष कुनल वेने अलग आत्तोर सब्बे खिलाफ संघर्ष संघर्ष किसोरे विकसित, मजबूत ओसो गट्टिक आत्ताद मंता।

सांगठनिक नेतृत्व संबंधित समस्यांग¹

उचुन मुल पार्टी ता सही आम कार्य दिशा तुन पेश कीयाना ओसो बेरसी किसी उंदी आम सिद्धांत लेवेके संकल्प लेक्का प्रचार कीयाना ओसो अदिन उंदी मत संगे अनुमोदन कीयानाए हालिंता इंजी आल्सिंतोर। इद्रम कीतेके सफलता तन्ना-तन्नाए दोरकिंता इंजी आल्सिंतोर। मति ओरा इद्रम समझेमायनादु गलत मंता, इद्रम समझेमासी ओरु तम्मा लोप्पा भ्रम तुन पोसे किसी तासिंतोर। तम्मा रुझान तुन इनपड़े बदले कियवा मंदाना निरंकुश अधिकारि ओसो नियम-कानून कुना कवर पोयसी उंदी डाका वेने मुन्ने दायला मना कीयाना कर्मचारिरे “लाल फीताशाही” पोरो वेहता समझदारी तुन बेरसी कींतोर। असल इत्तेके सफलतांग तन्ना-तन्नाए मोयोल पोरोटल उंदी-उंदी कीसी अरोंग आंतांग। सफलतांग पार्टी ता सही आम कार्य दिशा तुन व्यवहार संगे जोड़े कीसोर अमल कियाला काजे कीयाना तीव्र संघर्ष संगेने दोरकिंतांग। सफलतांग बस्के वेने बिना संघर्ष कियवा लेवा तम्मा-तम्माए दोरकोंग आतांग। पार्टी तन्ना आम दिशा अनुसार लेवेके अदिना अनुकूल बदे घोषणा कींता लेवेके बदे प्रस्ताव पारित कींतायो अदु सिर्फ शुरूआती काम मंदिंता। इदिन सफलता इनमूडायो। इदु सिर्फ सफलता दोरकी कीयाना आशा किन तोहिंता। सफलता इत्तेके आम कार्य दिशा बने कीता पेरके, समस्या ना सही समाधान परहकता पेरके अदिन लागू कियाला काजे अमल कीयाना कार्यशैली पोरो आधार आसी मंदिंता। सफलतांग पार्टी संगठन आम कार्यदिशा व्यवहार संगे तालमेल कीसोरे अमल कियाला काजे ताकना संघर्ष ओसो अद संघर्ष किन ताकी कियाला काजे योग्य कार्यकर्ता लोरा

¹ *रूसी कम्युनिस्ट पार्टी बोल्शेविक कांग्रेस काजे कामरेड स्टालिन ना रिपोर्ट

चुनाव तिंची ओसो नेतृत्वकारी निर्णय कु बद्रम अमल आया मंतांग? इंदानदिना सही जांचपड़ताल पोरो आधार आसी मंदितांग। पोरो वेहता लेक्का कियवेके पार्टी ता सही आम कार्य दिशा ओसो पार्टी ता सही समाधान कुना पोरो प्रतिकूल प्रभाव अरिता।

इदे आयवा, सही राजनैतिक दिशा ता निर्देश आता पेरके सब्बे निर्णय कीयाना (सही आम कार्य दिशा ता सफलता ओसो असफलता अनि अदिना वायना कालम ता निर्णय कीयाना) अदिन अमल कियाला काजे कीयाना कार्य संगठनात्मक कार्य ये मंदिता।

असल इतेके पार्टी ता आम कार्य दिशा किन व्यवहार ते लागू कीयानास्के वायना समस्यांग कुना खिलाफ सही ओसो ठोस संघर्ष कीतेकेने सफलता ओसो जीत दोरकी किया परमूडांता।

इव मुश्किल कुन वेंडसी मुन्ने दायला काजे पार्टी ओसो श्रमिक वर्ग किन एकता कीसी संघर्ष ता निर्माण कीयाना। इदिना काजे अयोग्य कार्यकर्ता लोर किन तेंडसि ओरा जागा ते बेसता कार्यकर्ता लोर किन तास्तेकेने सफलता दोरकिंता।

अव समस्यांग बवु? ओसो बेगा मंदितांग?

अव समस्यांग मना सांगठनिक कार्य लोप्पा मंदितांग। सांगठनिक कार्य संपन्न कीयाना नेतृत्व लोप्पा, नेतृत्व कीसोर मत्ता नेता लोरा लोप्पा, मना पार्टी कार्यकर्ता लोरा लोप्पा, सरकारी आर्थिक संस्थांग लोप्पा, श्रमिक संघ कुना लोप्पा, युवा कम्युनिस्ट लीग लोप्पा ओसो बचोनो संस्थांग लोप्पा इव समस्यांग मकसी मंदितांग।

शासनतंत्र ता निरंकुश अधिकारी “ब्यूरोक्रेसी” कोडही कानून-नियम कुना बहाना ते काम किन नेंड-नाड कीयाना रुझान “रेडटेपइज्म” सही ओसो ठोस नेतृत्व हियाना जागा ते “आम नेतृत्व संबंधित” अंगडम ता बोल्नुड नेतृत्व हियाना, काम पूरा कीयाना संस्थांग लोप्पा “पंक्शनल स्ट्रक्चर” दोहसी मंजी व्यक्तिगत जिम्मेदारी तल बचेमायना, काम लोप्पा व्यक्तिगत जिम्मेदारी हिल्ला मंदाना, वेतन कुना समान रूप हियाना, निर्णय कुन अमल कीयानास्के टाईम-टाईम ते सही जांच कियवा मंदाना, आत्म-

आलोचना तुकू वेरियाना। इव सब्बे मना समस्यांग ना डेरांग आंदुंग। मना सब्बे मुश्किलकु इविना लोप्पा ने डेरा वाटसी मंतांग।

प्रस्तावकु ओसो संकल्प कुन पारित कीतेकेना मुश्किलकु दूर आंतांग इंजी समझेमायना वेल्ले गलत आंता। पार्टी ओसो सरकार बंद निर्णय ओसो प्रस्ताव पास कींता अविना मौखिक रूप ते अविना समर्थन कीसोरे व्यवहारिक रूप ते अविन अलमारिंग लोप्पा वाटसियाना निरंकुश अधिकारि वेल्ले कालम तिंची इद्रम किया मंतोर ओसो इद्रम कियाला एक्सपर्ट आसी मंतोर। इव मुश्किल कुन पार कियाला काजे मना सांगठनिक कार्य ओसो पार्टी ता आम कार्य दिशा नइमा मत्ता कोहड़ा किन पाटे कीयाना वेल्ले जरूरत मंता। अद्रमे देश ता आर्थिक व्यवस्था ता सब्बे क्षेत्र कुना संगठन किन राजनैतिक नेतृत्व स्तर ता बराबर ते तेहना वेने जरूरत मंता। मना सांगठनिक कार्य व्यवहार ते पार्टी ता राजनैतिक नारा किन पूरा कीयाना लेक्का मंदांना।

पोरो वेहता पोल्लोंग मुश्किल कुन दूर कीयाना ओसो अविनिगडल वेंडसी जीत दोरकी कियाला काजे सांगठनिक संघर्ष ता वेल्ले जरूरत मंता। श्रमिक ओसो किसान समुदाय किन संघर्ष ते शामिल कीयाना वेने वेल्ले जरूरत मंता। इदे आयवा पार्टी किन वेने इद संघर्ष लोप्पा शामिल आयना जरूरत मंता। अयोग्य, अविश्वासनीय मंतोर, डुलमुल नीति लागू कीतोर, हिम्मत हारेमातोर किन पार्टी तल तेंडसियाना। इद्रम पार्टी ओसो आर्थिक संस्थांग ना सुद्धिकरण कीयाना वेल्ले जरूरत मंता।

इदिना काजे बाता कीयाना?

इदिना काजे दोड़ हीता सांगठनिक कबस्कु कीयाना।

1. आत्म-आलोचना, मना काम लोप्पा आयना गलतिंग किन स्पष्ट रूप ते चिन्हित कीयाना अभियान तुन बेहरा स्तर ते ताकी कीयाना।
2. समस्यांग ना सामना कियाला काजे पार्टी, सरकार, आर्थिक संस्थांग श्रमिक संगठनकु ओसो युवा कम्युनिस्ट लीग किन एकता आया लागियर।

3. पार्टी ओसो सरकार हियाना नारांग ओसो कीयाना निर्णय किन समन्वय कीसोरे अमल कीयाना संघर्ष लोप्पा श्रमिक ओसो किसान समुदाय कुन उंदीकट कीयाना।
4. श्रमिक समुदाय कुना लोप्पा “शॉक वर्क” ओसो अदिना संबंधित आदर्श किन विस्तृत रूप हियाना।
5. मशीन स्टेशन ओसो ट्रेक्टर स्टेशन कुना लोप्पा सरकारी कृषि क्षेत्र लोप्पा बेहरा स्तर ते पार्टी शाखांग ना निर्माण कीसोरे पार्टी नेतृत्व ओसो सोवियत नेतृत्व किन नाहकुना हेरे ओयना।
6. पीपुल्स कमिसार “जन सरकार कुना मंत्री लोरा शाखांग” ना मुख्य कार्यालय ओसो ट्रस्ट कुन सही तरीका ते विभाजन कीसी वाणिज्य नेतृत्व ओसो उद्योग नडमा गरे ता संबंध बने कीयाना।
7. काम लोप्पा व्यक्तिगत जिम्मेदारी ता व्यवस्था कीयाना। वेतन कुन समान रूप हियाना तरीका किन वेने खत्म कीयाना।
8. “फंक्शनल” व्यवस्था किन “कार्यनिर्वाहन कीयाना संस्थांग किन दोहची तासना पद्धति” तुन रद्द कीसी व्यक्तिगत जिम्मेदारी ता पद्धति किन बेरसी कीयाना। सामूहिक कार्य पद्धति किन तिलांजली हियाना तरीका तुकु लागू कीयाना।
9. निर्णय कुन अमल कीसी ओसो ज्यादा जांच पड़ताल कीयाना जरूरत मंता। कर्तव्य बदरम पूरा आया मंता? इंदानदिना पोरो जांच पड़ताल किन ओसो ज्यादा कियाला काजे - केंद्र जांच पड़ताल कमीशन ता, श्रमिक ओसो किसान लोरा इनस्पेक्शन ता कीयाना दोबारा शुरू कीयाना।
10. योग्य श्रमिक लोरा किन ऑफिस तल बदले कीसी उत्पादन ता गरे संबंध तासना पद ते चुने कीयाना।
11. बस्केने बदलेमायवा निरंकुश अधिकारिर ओसो फिजुल नियम किन पोयसी मंजी सब्बे काम कुना लोप्पा नडुम अर्ना कर्मचारिरा इतेके “लाल फीताशाही” ता पर्दाफाश कीसी, शासन तंत्र तल बाहर वाटसियाना।

12. पार्टी ओसो सरकार ता निर्णय कुना अतिक्रमण कियानोर किन, बहाना कियानोर ओसो बोल्लानोर किन ओरु मत्ता जागा तल तेंडसी ओरा जागा पूना ओसो जल्दी काम कियानोर किन “बिजिनेस लाइक” ओसो सौपे कीता काम किन मुख्य रूप ते बेस किया परना लेक्का टोर किन अनि सरकारी नियम कुन सही तरीका ते लागू कियानोर किन चुने कीयाना।
13. सरकारी संस्थांग, आर्थिक संस्थांग किन पूराए जांच कीसी कर्मचारिरा संख्या किन कम कीयाना।
14. आखरी विषय, वेल्ले विश्वास कीयाना लेक्का मंता, हिम्मत हारेमाता ओसो गुचसी मत्ता कार्यकर्ता लोर किन तेंडसी पार्टी ता संचालन कीयाना।

समस्यांग ना समाधान कीसी मुन्ने दायला काजे पोरो वेहता काम कीयाना जरूरत मंता। मना सांगठनिक कार्य किन राजनैतिक नेतृत्व स्तर एवनल तेहाना। इव सब्बे कीसीए पार्टी ता आम कार्य दिशा तुन सही तरीका ते अमल कियमूंडांता।

इंजे माटु बद कालम ता समालोचना किया मंतोमो अद कालम ते केंद्र कमेटी ता सांगठनिक-कार्य पोरो वेहता लेक्काने आयनदु इंजी मीटु सब्बे तोर पुंजी मंतिर। अद कालम ते केंद्र कमेटी मुन्ने लेनिन ना मूल्यवान सीख मार्गदर्शन बनेमासी मत्ता। अद सबक ता अनुसार, सांगठनिक कार्य लोप्पा ध्यान हियाना पोल्लो - बेसता मानेय किन चुने कीयाना ओसो ओरा काम पोरो “निर्णय कुना अमल पोरो” सही जांचपड़ताल मंदानदु मंता।

सही मानेय किन चुने कीयाना ओसो तन्ना पोरो तास्ता विश्वास किन झूठा साबित कीसी तन्ना काम लोप्पा विफल आता मानेय तेंडसियाना ता बारे ते रेंडु पोल्लिंग वेहाकान।

तन्ना निरंकुशता तल उचुन वेने बदलेमायवा मंदाना अधिकारिर ओसो लाल फीताशाही लोरकिन तेंडसियाना बारे ते माटु अलग विचार तासनायो। वीरा बारे ते पेरके वेहाकान। इंजे नन्ना काम ता रफ्तार किन कमजोर कीयाना ओसो काम लोप्पा बाधा वाटना, मुन्ने दायना हरीं किन रोमी कीयाना कार्यकर्ता लोरा बारे ते वेहाकान।

वीरा लोप्पाटल उंदी रकम ता कार्यकर्ता लोर मुन्ने बदे आई सेवा कीताद मंता मति इंजे इनपड़े निरंकुश बनेमासी मंतोर। ओरु "पार्टी ता निर्णय ओसो सोवियत सरकार ता कानून ओरा हिल्ले, इव निर्णय, कानूनकू समझेमायवा मंदानोर, बुद्धिहिल्लेवोरा काजे मंता, पार्टी ओसो सरकारी निर्णय कुन अमल कियानोरा जिम्मेदारी मावा पोरो हिल्ले" इंजी आल्सिंतोर।

वीरे लोकरु पार्टी ता बुनियाद किन ध्वस्त कींतोर अनि सरकारी अनुशासन किन भंग कींतोर। वीरु बदिना पोरो आधार आसी पार्टी ता निर्णय ओसो सरकारी शासन ता बारे ते लब्बड़ ता रुझान लागू कीसी मंतोर? वीरु हत्ता दिव्यंग ने सेवा कीतादिन हूइसी सोवियत सरकार ओरकिन बाताले किया परवो इंजी आल्सिंतोर। इद्रमतोर वेल्ले कपटी ओसो पाखंडी मंदिंतोर। वीरु "ओर हिल्ला काम बिल्कुले ताका परवो। नेतृत्व संस्थांग ना निर्णय कुना उल्लंघन कीतेके वेने माकिन बोरे बाताले किया परवोर" इंजी आल्सिंतोर। इद्रम ता कार्यकर्ता लोर किन बाता कीयाना? वीरा पाइना सेवा बाताल मत्तेकाई, वीर किन नेतृत्व पद तिंची पेरके-मुन्ने आयवा लेवा तेंडसियाना। [सही मंता..... सही मंता इंजी कोलार पोय्या मंता] वीर किन दोड़ स्तर ते चुने कीयाना। [इद्रम जरूर कीयाना इंजीकोलार पोय्य मंता] इद्रम तोरा घंमड तुन पोच्चांग किसी वीरा जागा बेगा मंता वीरकिन बेगा मंदाना जरूरत मंता अगा तासना जरूरी आंता। इद्रम कीयानाद मना काम लोप्पा ओसो सोवियत अनुशासन लोप्पा टढ़ मंदाना काजे जरूरी मंता। [निज्जमे.... निज्जमे..... इंजी केंजा वाया मंता]

दूसरा रकम ता कार्यकर्ता लोरा बारे ते इत्तेके इंजे नन्ना पोंगडिंंग लोरा बारे ते वेहा मंताना। वीरकिन पोंगडिंंगे ओसो ईमानदार पोंगडिंंग इंदा परितोम। [टह-टह इन्हा कव्वा लेंग] वीरु सोवियत सरकार ता वेल्ले विश्वासनीय लोकरु मंदिंतोर। ईमानदार वेने मंदिंतोर। मति बदे वेना काम कीयाना लेक्का हिल्लेर। वीरु बदे वेने काम किन सही तरीका ते पूरा किया परवोर आंतोर। हत्ता साल इद्रम ता वरोर कार्यकर्ता ना संगे नाकिन वड़कला मौका दोरकता। ओरु वेल्ले बेसता ओसो सम्मान दोरकी मत्ता

मानेय मत्तोर। इदे आयवा वेल्ले बोल्लुइ मानेय वेने मत्तोर। बचोन महत्वपूर्ण समस्या किन पोयतेकाई ओरु तन्ना अंगडम ता पोल्लोंग ने मुडंदसी अदिन अंगडम बने कीसिंतोर। ओना संगे नावा वार्तालाप - दोड़ रास्ता लेक्का मंता।

नन्ना- विज्जा वीतना काम बद्रम ताका मंता?

ओरु- विज्जा वीतना! कामरेड स्टालिन! माट्टु सब्बे जमा आसी मत्तोम [वेल्ले जोर ते कव्वा ना लेंग]

नन्ना- अद्रमा, ताना पेरके?

ओरु- ताना पेरके चर्चा उंदी केंद्र ते एवता इंजी समझेमायमूट कामरेड स्टालिन! इंजे जल्दिए खास मोड़ ते एवियर।

नन्ना- अद्रम, काम ता बारे ते बाताल आता?

ओरु- माकिन काम लोप्पा उचुन विकास आयना लेक्कटा लक्षणकु दिस्सा मंतांग। [कव्वना लेंग वांता]

नन्ना- इव सब्बे तो बेसे, मति विज्जा वीतना काम बचोन आता?

ओरु- कामरेड स्टालिन, मीट्टु पूछेमाया मंतिर अदिन काजे विज्जा वीतना काम उचुन वेने मुन्ने हत्ताद हिल्ले इंदा लागियर। [टह-टह इनाह कव्वना लेंग वाता]

इद्रम मना बोल्लुइ लोकुरा असली रूप दिसिंता। इद्रम ता बोल्लुइ लोकुर नियमित रूप ते मीटिंग कींतोर। समस्या ता बारे ते चर्चा कींतोर, चर्चा उंदी केंद्र ते एविंता, सही मोड़ ते वेने वांता। चर्चा लोप्पा उचुन प्रगति वेने वांता। सब्बे बेस ताकसोर मत्ता लेक्का दिसिंता। इद्रम आतेकाई काम बेगाटा अगाने रोमसी मंदिंता।

इस्सले नन्ना वरोर यूक्रेनियन मजदूर किन कलियताना। नन्ना ओनकिन पूछेमातान अद संस्था काजे बदे ठोस कार्यनीति मंताया? इंजी, अस्के ओरु पोरो वेहता लेक्कटा मानेय ना लेक्काने बोल्लना शुरू कींतोर। ओरु "अद संस्था वालेर निज्जमे बदे ठोस कार्यनीति मत्ता लेक्काने मंता मति ओरु इंजे एवनल बाता कीताद हिल्ले" इंतोर। [सब्बे तोर टहटह इन्नाह कव्वा मंतोर] अद्रमासी अद संस्था लोप्पा वेल्ले बोल्लानोर मत्ता लेक्का मंता।

इद्रम ता बोल्लुइवादिर किन ओरा पद तल तेंडसी सही काम कियानोर किन ओरा जागा ते तासना अनि ओरकि दूसरा जागा ते लोहना। अस्के ओरु इद्रम बारांकु बदली आता रा इंजी तल्ला पोय्यनूर। ओसो उटपुटांग सवाल कियानूर - ओरा सवाल कु दोइ रास्ता लेक्का मंदानुग।

"माकिन बारांकु तेंडा मंतिर? बद काम कीयाना लोप्पा मावा गलती आता? माटु शाक वर्क सभा कीताद हिल्लेया? माटु शाक वर्ग सभा लोप्पा पार्टी ता ओसो सरकार ता नारांग वाटताद हिल्ले या? माटु केंद्र कमेटी ता पूरा पोलित ब्यूरो किन सम्मानित अध्यक्ष वर्ग लेक्का चुने कीवोमा? (वेल्ले जोर ते कव्वा मंतोर) माटु कामरेड स्टालिन किन अभिनंदन लोहताद हिल्ले या? इदिनकु ज्यादा माटु ओसो बाता किया परितोम? इद्रम सवाल कीसोरे किल्लितोर।" (वेल्ले जोर ते कव्वना लेंग वाता)

बाताल कीतेकाई इद्रम बोल्लानोर बदलेमायोर आंतोर। मति ओरा संगे बद्रम व्यवहार कीयाना? ओरकिन मुख्य काम लोप्पा ओसो काम ताकीह कीयाना जागा ने तास्तेके इद्रम ता बोल्लुइवाद समस्यांग ओसो वेने बोल्लुइवादी भाषण कुना समुंदर ते मुइंदिह कियानूर। अदिन काजे नेतृत्वकारी पद तल गुचिह कीयाना। मुख्य काम वाले जागा ते इद्रम तोर किन तासनायो। (कव्वना लेंग वाता।)

सोवियत ता वित्तीय संस्थांग काजे सही मानेय किन चुने कीयाना ओसो निर्णय कुन अमल कीयाना काम बद्रम ताका मंता? इदिन गरे तल जांच कीयाना लेक्कटा कर्तव्य कुन केंद्र कमेटी बद्रम पूरा कीता? इंदाना पोल्लो ना बारे ते नन्ना मुन्ने ने संक्षिप्त ते वेहताद मंता। मना कांग्रेस एजेंडा ता तीसरा विषय ता बारे ते वड़कनास्के कामरेड कगनोविच पोरो वेहता पोल्लो ना बारे ओसो ज्यादा विस्तृत रूप ते वेहानूर।

इंजे निर्णय किन लागू कीयानास्के गरे तल जांच कीयाना बारेते रेंडु पोल्लोंग वेहाकान।

सही जांच कीयाना वेल्ले महत्वपूर्ण पोल्लो मंता। निरंकुश अधिकार ओसो उंदी रकम ता ऑफिस कामकाजी तरीका खिलाफ कीयाना संघर्ष लोप्पा इद जांच ता वेल्ले महत्वपूर्ण मंदिता। जांचपड़ताल संगे माटु सही टाई ते नेतृत्व संबंधित संस्थांग ना निर्णय सही अमल आया मंता या हिल्ले

इंजी चिन्हित किया परितोम। इदे आयवा निर्णय सही तरीका ते अमल आया मंताया गलत तरीका अमल आया मंता? शासनतंत्र, पार्टी लोप्पा काम कीयाना कैडर सचेतन, बोल्शेविक ट्रेनिंग संगे काम किया मंतोरा नौकरिंग पोयसी हिरकसी मंजी विचार हिल्वा काम किया मंतोरा? इंदानदु सही जांच पड़ताल संगे ने पुनमूडांता। कैडर बद्रम काम किया मंतोरा? निरंकुश अधिकारिर (रेडटेपइस्ट) काम किन नड़मा हिरकिह कीसी तासिस मंतोरा? इंदानदु पुंदाला काजे जांचपड़ताल उंदी सर्चलाईट लेक्का मंता। मना नब्बे प्रतिशत गलतिंग माटु सही इद सर्चलाईट ता इस्तेमाल सही तरीका ते कियवांके आंतांग। जांच पड़ताल ता सही तरीका ते इस्तेमाल कीतेके मना गलतिंग, विफलतांग किन जरूर दूर कियाकोम इंदा लोप्पा बदे डावुट हिल्ले।

इत्तेके जांच पड़ताल किन सफल कियाला काजे अदिन आखरी लक्ष्य एवनल कम से कम रेंडु अंश कुना जरूरत मंदिता। उंदी - काम ता जांच पड़ताल असंपूर्ण रूप ते ओसो विचार हिल्वा कीयाना आयो, अदिन सही तरीका ते कीयाना। रेंडु- पार्टी लोप्पा सरकार लोप्पा ओसो वित्तीय संस्थांग लोप्पा हर जागा जांच काम किन दूसरा श्रेणी तोर किन सौपे कीयानायो। परताचोन अव संस्थांग ना नेता लोरकिने सौपे कीयाना।

सांगठनिक क्षेत्र ते मना कर्तव्य दोड़ रास्ता लेक्का मंतांग।

1. मना राजनैतिक कार्यदिशा अनुसार मना सांगठनिक कार्य किन सुधरे कीसोर मंदाना क्रम हमेशा जारी तासना।
2. मना सांगठनिक नेतृत्व किन राजनैतिक नेतृत्व स्तर एवनल पोरो तेहना।
3. मना सांगठनिक नेतृत्व, पार्टी नारा ओसो निर्णय किन सही तरीका ते कार्य रूप हियाना लेक्का मंदाना।

हर विषय ते कैडरे निर्णायक मंदिंतोर²

"तकनीक (साइन्स ता ज्ञान, निपुणताए) हर विषय लोप्पा निर्णायक मंदिंता।" इद नारा मना पाड़ना नीति ता आंदू। इदु मनाकिन तकनीकी ज्ञान कम मत्तास्केटा नीति आंदू। मति इंजे मना नारा "हर विषय ते कैडर लोरे निर्णायक मंदिंतोर" इंजी मंता। इदे इंजेटा मना प्रधान नारा आंदू।

इद पूना नारा ता महत्व किन मना सब्बे लोकर बेस समझेमाताद हिल्ले या? माकिन वीरू समझेमातद हिल्ले इंदा लागिंता। वीरू इद नारा ता महत्व समझेमातेके (निन्नेहन्नेटा लोकरा बारेते, मजदूर, कैडर लोरा बारे तम्मा व्यवहार ते मत्ता घोर ओसो विवरण दृष्टिकोण तोहा मंतोर) इद्रम कीवोर आंतोर। "कैडर लोरे सब्बे विषय लोप्पा निर्णायक मंदिंतोर" इंदाना नारा अनुसार इंजे माटु बाता कीयाना? इदिना अनुसार मना नेता लोर "सुडला" "बेहरा" फर्क कीसोरे सब्बे कार्यकर्ता लोरकिन जीवा कीसी हूड़ना। ओरा बारे वेल्ले आल्सिसी ओरकिन विकास कियाला कोशिश कीयाना। ओरकिन बस्के जरूरत आंता अस्के सहायता हियाना। पहली बेरा ओरु तम्मा काम लोप्पा सफल आतेके ओरकिन गिर्दा कीयाना, मुन्ने दायला ओसो ज्यादा सहयोग कीयाना। ओरकिन बेहर पद ते वाटना ओसो बेहरा-बेहरा जिम्मेदारिं गे वाले जागा ने प्रमोट कीयाना। मति असल व्यवहार ते कैडर लोरा बारे ते बिल्कुले आल्सवा मंदिंतोर। कायता व्यवहार कींतोर। इद्रम ता परिस्थिति लोप्पा बदलाव तत्तान वेल्ले जरूरत मंता। कैडर लोरा बारे ते बेस अध्ययन कीयाना। नेता लोर कैडर लोरा अध्ययन कीतेके सही पद ते नियुक्त कीवेर। मति नेतालोर कैडर लोरा बेस अध्ययन

² लाल सेना अकादमी ता उंदी प्रोग्राम लोप्पा 4 मई 1935 ते कामरेड जोसेफ स्टालिन हिता भाषण

किवांके ओरकिन मोहरांग लेक्का तम्मा विचार वाता लेक्का हिव्के-हक्के बदले कीसोर मंतोर। यंत्र ता मूल्य तय कीसी मील ओसो कारखाना लोप्पा बचोन यंत्र मंतांग इंदाना रिपोर्ट लोहना इंदानदु मना लोकर बेस करियसी मंतोर। मति खास टाईम ते माटु बचोन लोकर किन प्रैक्टिस कियिहता मंता? काम लोप्पा प्राक्टिस काजे ओरकिन बद्रम सहयोग कीताद मंता? इद विषय ते अचोन गिर्दा ते रिपोर्ट लोहतादु नन्ना उंदी वेने हूइताद हिल्ले। इंजे माटु इद परिस्थिति किन बाता इंदा परितोम? इदिना बारे ते माटु इंजे एवनल कर्मचारि लेवेके कैडरलोरा मूल्य वाटला करियताद हिल्ले इंजी इंदाए परितोम।

नन्ना साईबेरिया ते मंदानास्केटा उंदी पोल्लो सुरता वाया मंता। पहली मुसुर ते डोडुंग लोप्पा ऊसा वासी मत्ता। उंदी डोडु पोंगसोरे मत्ता काष्ठों किन डोडु ओदा वाटला काजे तीस लोकर हंजी मत्तोर। नुल्पे एवनल ओरु नाटे वातोर। मति वरोर मानेय कम मत्तोर। उन्तीस लोकुरे वापिस वातोर। तीसवां मानेय ना बारे ते पूछेमातेके ओरु वेल्ले लापरवाही ते जवाब हीसोरे ओरु अगाने मंतोर इत्तोर। नन्ना ओसो पूछेमाता "अगाने मंतोर इत्तेके?" जवाब दोरकता "अगाने मंतोर इत्तेके ओनकिन डोडु ओता" इंजी इत्तोर। ओरु वेल्ले लापरवाही ते हल्को जीवा तेने इत्तोर। ओरा लोप्पटल वरोर मानेय दायला काजे वेल्ले जल्दी किया मंतोर। ओरु बार-बार "नावा घोड़ा किन एर हियाना मंता। नन्ना जल्दी दायकान" इंदा मंतोर। नन्ना ओरकिन सतर्क कीसोरे इत्तान - "नीकिन जानवर ता बचोन चिंता मंता अचोन मानेय ता चिंता हिल्ले।" ओरा लोप्पटल वरोर इत्तोर - "निज्जमे। मानेय ना बारे ते माटु बारांकु चिंता कीयाना? माटु मानेय किन पुट्टिह किया परितोम। मति उंदी घोड़ा कमई कीयाना वेल्ले मुश्किल मंता? माटु उंदी घोड़ा तत्तेके पुंदाकिर।"

बाकी लोकर वेने ओना समर्थन कीसोरे तल्ला होलेह किया मंतोर।

इगा इद उदाहरण ता ज्यादा महत्व हिल्ले मति इद उदाहारण लोप्पा वेहता स्वभाव किन हूइतेके अदिना महत्व मंता। नावा हिसाब ते मना उचुन नेता लोर लोकुरा बारे ते ओसो कैडर लोरा बारे ते इद्रमे व्यवहार कींतोर। लोकुरा ओसो कार्यकर्ता लोरा मूल्य चीनेमायाला बाधा वायना लक्षण कु

इद साईबेरिया ते वरोर मानेय दूसरा मानेय ना बारे ते बद्रम लापरवाही रुझान तोहितोरो अद्रमे इगाटा उचुन नेता लोरा रुझान मंता।

अदिन काजे कामरेड्स माटु काम कियानोरा कमी दूर कीयाना इत्तेके कार्यकर्ता लोरा कमी दूर कीयाना ओसो माटु मना देश काजे जरूरी ओसो योग्य कैडर दोरकना ओसो देश मुन्ने दायना इत्तेके सबसे मुन्ने जनता ना मूल्य किन चीनेमायना कैडर ता मूल्य किन चीनेमायना। मना लक्ष्य किन सफल कीयाना हर मानेय वरोर कार्यकर्ता ना मूल्य किन चीनेमायला करियाना।

दूनिया लोप्पा मत्ता बहुमूल्य पूंजी लोकुरे आंदुर, इत्तेके कैडर लोरे आंदुर। इस्सल मना इव परिस्थितिंग लोप्पा “कैडर लोरे निर्णायक मंदितोर” इदिना पोरो ध्यान हियाना जरूरत मंता। मना उद्योग लोप्पा कृषि क्षेत्र ते यातायात लोप्पा ओसो सेना लोप्पा बेसता कैडर मत्तेके मना देश जीड़ियर। मनगा बेसता कैडर हिल्वेके मना रेंडासी काल कूटाल आसी मंतांग इंजी आल्सना। मनम वेने कूटसोर ताकना लेक्का आंतोम।

नन्ना नावा भाषण किन मारी कीयाना मुन्ने लाल सेना अकादमी ता ग्रेजुवेट कुना जीत ता आशा कींतान अनि ओरकिन अभिनंदन कींतांग। नन्ना मना देश ता रक्षा ता जरूरत कुन पूरा कियाला ओरु सफल आयनूर इंजी आशा किया मंतान।

कामरेड्स, मीटु बेहरा स्तर ता विद्या संस्थांग लोप्पाटल पास आसी दाया मंतिर। इगा मीटु मीवा प्रैक्टिस ता पहली चरण पूरा कीताद मंता। मति पाठशाला ता अभ्यास सिर्फ शुरूआती अभ्यासे मंदिता। असली अभ्यास व्यवहार ते मुश्किल कुना वेंडसोरे कीयाना लोप्पा दोरकिंता। मुश्किल कुन हूडसी वेरिया मंदानोर, मुश्किल कुन दूर कियाला, मुश्किल कुन वेंडला काजे मुश्किल कुन चीने मांतोरो ओरे सच्चा कामरेड मंदितोर। मुश्किल कुन कुना सामना कीयाना संघर्ष कीयानास्के ने बेसता कैडर तैयार आंतोर मना सेना लोप्पा अनुभवी कैडर वेल्ले संख्या ते मत्तेके मना सेना निज्जमे जीड़ियर।

कामरेड्स मीटु सब्बे तोर स्वस्थ ओसो खुश मंदाना इंजी आशा कींतान।

कैडर लोरा चुनाव, प्रमोशन ओसो वितरण³

सही राजनैतिक दिशा किन माटू स्वीकार सिर्फ घोषणा कीसी विइसला काजे कीवोम आंतोमा। अदिना माटु व्यवहार ते लागू कियाला काजे स्वीकार कींतोमा। मति सही राजनैतिक दिशा किन अमल कियाला काजे कार्यकर्ता लोरा जरूरत मंता। कार्यकर्ता लोर अद सही दिशा किन स्वीकार कीयाना अदिना तम्मा सही दिशा ते माने मायना, अदिन व्यवहार ते तत्ताल काजे तैयार मंदाणा, अद दिशा खिलाफ बदे आलोचना वांतायो अदिना जवाब हीसी अदिना रक्षा कियाला संघर्ष कीयाना लेक्कटा कार्यकर्ता लोरा जरूरत मंता। इद्रम ता कार्यकर्ता लोरा चुनाव कीयाना लोप्पा विफल आतेके सही राजनैतिक दिशा पोरोल तुके मंदाणा खतरा मंदिता।

अदिम काजे कैडर लोरा सही तरीका ते चुनाव कीयाना जरूरत मंता। कैडर लोर किन सही तरीका ते चुने कीयाना ओरकिन प्रशिक्षण हियाना, पूना कैडर प्रमोट कीयाना ओसो ओरा सही तरीका ते आवंटन कीयाना, ओरा काम लोप्पा दोरकता सफलतांग पोरो आधार आसी अविन जांच पड़ताल कीयानावु उंदी समस्या आंदू।

कैडर लोर किन सही तरीका ते चुने कीयाना इत्तेके?

कैडर किन चुने कीयाना इत्तेके मना नालुंग बगिल सहायक ओसो मना दोड़ मंदानोर किन उदिह कीयाना ओसो उंदी ऑफिस तेरियसी उंदी पेरेके उंदी लगातार आदेश जारी किसोर दायना (जोर ते कवतोर) लेवेके मना अधिकार ता गलत इस्तेमाल कीसोरे सैकड़ों कर्मचारिर किन हिक्के-हक्के

³ सोवियत कम्युनिस्ट पार्टी (बोल्शेविक) 18 वी कांग्रेस ताकनास्के (1939) कामरेड स्टालिन ना भाषण।

कीयाना, उंदी काम तल दूसरा काम ते वाटसोर "पुनर रचनात्मक कार्यक्रम" ता रचना कीयाना बस्केने सही मन्ने आंता। (कव्वना लेंग वांता)

कैडर लोरा चुनाव कीयाना

पहला - पार्टी ओसो राज्य काजे कैडर उंदी सोना ता खदान लेक्का मंता। ओरु उंदी खजाना लेक्का बस्के ने खाली आयोर आंतोर। इंजी कैडर लोरा सम्मान कीयाना।

दूसरा - कैडर लोरा बारे ते बेस जानकारी दोरकी कीयाना। ओरा कमजोरिंग ओसो क्षमतांग ना बारे ते वेने पुंजी मंदाना। अमुक कार्यकर्ता बद्रम काम किया परितोर? बद्रम काम किन विकास किया परितोर? इंजी बेस समझेमायना।

तीसरा - कैडर लोर किन खास ध्यान हीसी विकास कीयाना। योग्य मत्ता हर कार्यकर्ता ना विकास काजे सहयोग कीयाना। सुडला-सुडला पोल्लोंग काजे ओरा पोरो होंग आयनायो। ओरु जल्दी विकसित आयना इंजी ओरा संगे जीवा कीसी मंदाना।

चौथा - पूना कार्यकर्ता लोर, पूना लेयोर कार्यकर्ता तम्मा पाड़ना पद ते काम कीसी-कीसी दोगितोर। अनि कमजोर आंतोर। टाईम ते ओरकिन प्रमोट कीसी पोर्सेटा पद ते बेहरा जिम्मेदारी ते नियुक्त कीयाना।

पांचवा - हर मानेय किन तम्मा काजे लायक काम दोरकता इंजी विचार आयना। हर मानेय मना लक्ष्य किन पूरा कियाला काजे बाता किया परितोरो पूरा ताकत संगे कीयाना लेक्का हूड़ना। माटु बद राजनैतिक आम दिशा ता (आम लाईन) किन अमल कियाला कादे कैडर लोरिन अलग-अलग काम ते वाटितोम अद आम दिशा ता जरूरत तुन पूरा कीयाना लक्ष्य किन मुन्ने तासिसी कैडर लोर किन अलग-अलग काम ते वाटना।

इद विषय ते मुख्य पोल्लो सही टाईम ते पूना ओसो युवा कैडर लोर किन प्रमोट कीयानादु मंता। नाकिन कित्तेके इद विष्य लोप्पा बदे स्पष्ट नीति मना मुन्ने हिल्वा लेक्का लागिंता। उचुन मुल मानेय किन चुने कीयानास्के खासकर पाड़ना कैडर पोरो आधार आसी मंदाना सही समझेमांतोर। इदिना उल्टा ओसो उचुन मुल बिल्कुल पूना कैडर पोरो

आधार आसी मंदाना बेस आल्सिंतोर। नावा हिसाब ते इव रेंडासी पोल्लोंग गलत मंतांग।

पाइना कैडर पार्टी ओसो सरकार काजे मूल्यवान संपत्ति मंतोर इंदानदु निज्जमे। वेल्ले बेहरा नेतृत्व ता अनुभव, मार्क्सवादी-लेनिनवादी सिद्धांत ता अध्ययन, विषय ज्ञान, कार्य किन तम्मा लक्ष्य ता दिशा अनुसार कीयाना लेक्का युवा कैडर लोप्पा कमी मंदिता। इद्रम ता सब्बे लक्षण पाइना कैडर लोप्पा हालनाचोन मंता इंदानदु निज्जमे। असल पोल्लो बाताल इत्तेके मना किन जरूत अनुसार कैडर बस्केने दोरकोर आंतोर। ओरु हमेशा जरूरी संख्या तुकू कमीए मंदिंतोर। इदे आयवा ओरु हल्कोए सफलतांग दोरकी कीयाना लेक्का काम किया परवो आतोर। पाइना कैडर लोर उचुन पाइना कालम किन पोयसी मंदिंतोर। ओरा कोंडा ते हमेशा पाइना कालमे मंदिता। पाइना विषय ओसो तरीकांगे ओरा कोंडा ते मत्तांकु पिस्वल ता पूना अंश किन (पिस्वल ते पूना-पूना पुटसी संगे-संगे ताकना) हूइला विफल आंतोर। इदिन “पूनादिन चीनेमायवा मंदाना” इंतोर। इदु वेल्ले बेहरा गलती आंदू।

मति पाइना कैडर लोरा लेक्काने पूना कैडर लोर किन अनुभव प्रशिक्षण संबंधित ज्ञान, उंदी लक्ष काजे सब्बे कार्य किन सही तरीका ते कीयाना क्षमता मन्नी आंता। मति पूना कैडर लोरा पक्ष ते उचुक पोल्लो इगा वेहता लेक्का मंतांग।

पहली - युवा कैडर वेल्ले बेहरा संख्या ते मंतोर।

दूसरा - ओरु लेयोर मंतोर जल्दीए बीमार आयना वेर्री मन्नी आंता।

तीसरा - ओरा लोप्पा पूनादिन चीनेमायना ओसो अदिना बगिल दायना रुझान वेल्ले मंदिता।

चौथा - ओरु वेल्ले जल्दी ज्ञान दोरकी किसी विकसित आया परितोर। पूना कैडर वेल्ले जल्दी मुन्ने दाय परितोर। ओरु वेल्ले जल्दी मुन्ने हंजी उचुने कालम ते पाइना कैडर लोरा जागा एतना लेक्का आंतोर। इदे आयवा पाइना कैडर लोर मुन्ने वेने मुन्ने दांतोर।

पोरो वेहता पोल्लोंग हूइतेके स्पष्ट रूप ते इंजे मना समस्या पाइना कैडर लोपा आधार आसी लेवेके पूना कैडर पोरो आधार आसी हिल्ले इंजी

समझेमायर। इंजे मना समस्या पाइना-पूना सही तरीका तालमेल किसी पार्टी ओसो सरकार नइमा समन्वय बद्रम किया परमूडांता इंदाना समस्या मना मुन्ने मंता। वेल्ले जोम कव्वना लेंग वाता।

अदिनकाजे युवा कैडर किन सहीत टाईम ते नेतृत्व जागा ते प्रमोट कीयाना। इंजे माटु काल बारे ते वड़का मंतोम अद कालम ते पार्टी उंदी खास विषय पोरो जीत दोरकी कीता। अद विषय पार्टी पाइना ओसो पूना कैडर किन दोड़ तल पोरो एवनल सही तरीका ते सम्मिलित किया परता।

केंद्र कमेटी लोप्पा मत्ता लेखाजोका ता हिसाब ते इंजे पांच लाख युवा बोल्शेविक लोर किन पार्टी सदस्य, पार्टी समर्थक लोरिन सरकारी नेतृत्व जागा ने पार्टी पद काजे प्रमोट कीताद मंता। वीरा लोप्पा बीस प्रतिशत आस्कु मंतांग।

इंजे मना कर्तव्य पार्टी लोप्पा पोरो टल दोड़ एवनल कैडर चुने कीयाना काम वरोर संस्थापक ना कैदे वाटसी अदिन सही, वैज्ञानिक ओसो बोल्शेविक स्तर एवनल पोरो तेहनादु मंता।

आचरण पोरो⁴

पार्टी ता राजनैतिक कार्य किन सुदृढ बद्रम कीयाना

माटु आर्थिक अभियान ताकी कीयाना, आर्थिक जीत लोप्पा ने पूरा मुडुंदसी मंजी राजनैतिक समस्यांग किन मरंगसितेके मना परिस्थिति वरोर कानाल हीकट ते मेरस्कसोर मंदाना लेक्का आंता। नावा हिसाब ते नावा पोरो वेहता पोल्लो अर्थ मीटु सब्बे तोर समझेमासी मंदाकिर। तानकिन आत्मसात वेने कीसी मंदाकिरे। अदिन काजे इंजे मावा कार्यकर्ता लोरा दृष्टि किन राजनैतिक समस्यांग ना बगिल कीयाना जरूरत मंता। इद्रम कीतेके आर्थिक जीत कुन राजनैतिक कार्य संगे जोड़े किया परितोम अनि अव जीत कुना संगे-संगे पार्टी ता राजनैतिक कार्य किन वेने सफल किया परितोम।

पार्टी ता राजनैतिक कार्य किन सुदृढ बने कीयाना ओसो पार्टी संगठन किन आर्थिक कार्य कोहड़ा तल बाहरो पिडुंगना इद कार्य कर्तव्य तुन कार्य रूप हियाना लोप्पा माटु बद्रम सफलता दोरकी किया परितोम? मना चर्चांग निगडल नाकिन उचुन कामरेड्स इंजे माटु पूर्ण रूप ते आर्थिक कार्य कुन बंद किया परितोम इंजी गलत आल्सिंतोर इंदाना लेक्का लागा मंता। बाताल आतेकाई इंजेटल उंदी भावना, तीरम ओसो हल्को लेंग ते केंजा वाया मंता"..."इंजेटल माटु आर्थिक कार्य कुना समस्यांग नल जेक मंदा परितोम। इंजे माटु राजनैतिक कार्य लोप्पा पूरा रम्मे मासी मंदा परितोम इंजी।" इद्रम ता विचारकु इंजेटले केंजा वाया मंतांग। इद्रम ता निर्णय कीयाना सही मंता या? हिल्ले, इनपड़े हिल्ले। पार्टी कामरेड्स

⁴ (बोलशेविक पार्टी केंद्र कमेटी प्लीनम मीटिंग 1937 ते "सात सवाल कुना जवाब" पोरोल ते स्टालिन ना समापन भाषण)

आर्थिक जीत ते मुड़ंदसी मंजी राजनीति तल जेक आयनदु मना काजे बचोनो नुकसान कुना कारण बनेमाता। अदिन उंदी अतिवादी कार्य, उंदी बगिल पोंगसोर दायना कार्य मानेमाताद मंता। पार्टी ता राजनैतिक कार्य लोप्पा केंद्रित मत्तोरु आर्थिक कार्य तल पूराए जेक दायला आल्सतेके वेने उंदी अतिवादी कार्य लेक्के आंता। दूसरा बगिले पोंगना कार्य लेक्का आंता। इदिनगडल वेने आर्थिक जीत लोप्पा मुड़ंदसी राजनीति बगिल लापरवाह मंदाना तल आता लेक्काने नुकसान आंता। अदिन काजे बस्केने वेने उंदी तल दूसरा ते डेयना काम कीयानायो। माटु राजनीतिक कार्य तल जेक आयनायो अद्रमे आर्थिक कार्य तल वेने पूरा जेक आयवा मंदाना। अध्ययन ता सुविधा, विषय किन हल्कोए समझेमायना सुविधा किन दृष्टि ते तासिसी साधारण ओसो आर्थिक समस्यांग किन राजनीति तल अलग किसी हूड़ितोर। अद्रमासी पिस्वल लोप्पा, व्यवहार ते राजनीतिक ओसो आर्थिक विषय उंदी दूसरा तल अलग किया परवा लेक्का जुड़ेमासी मंतांग। माटु व्यवहार लोप्पा, राजनीतिक ओसो आर्थिक कार्य किन अलग कियाला आल्सतेके वेल्ले बेहरा गलती आयर। बदे राजनीति किन कम कीसी राजनीतिक कार्य किन सुदढ़ बने कियाला आल्सतेके निज्जमे वेल्ले गुप्पा हीकट ते मेरस्कना लेक्का आयार।

कार्यकर्ता लोर किन बद्रम चुने कीयाना!

कार्यकर्ता लोरा सही चुनाव कीयाना ओसो ओरकिन सही तरीका ते काम ते वाटना इत्तेके बाताल?

पहला - राजनैतिक प्रमाण संगे कार्यकर्ता लोरा चुनाव कीयाना। इत्तेके कार्यकर्ता लोर किन चुने कीयानास्के ओरु राजनीतिक रूप ते विश्वास कीयाना लेक्का मंतोरा, हिल्लेर इंजी हूड़ना जरूरी मंता।

दूसरा - व्यवहार पोरो आधार आसी चुने कीयाना इत्तेके माटु चुने कीयानोरा बारे ते बदे ठोस कार्य किन ओरु किया परितोर परवोर इंजी हूड़ना। अद काम काजे ओरु सही मंतोरा हिल्लेर इंजी हूड़ना।

इत्तेके जल्दी-जल्दी काम पूरा कीयाना दृष्टिकोण लागू किसी एकदम बिजिनेस लाईक "व्यापारिक" दृष्टिकोण लागू कीसी, कार्यकर्ता

लोरा लेक्का काम कीयाना किने हूइना ओसो ओरा राजनैतिकिन् स्वभाव पोरो ध्यान हियवा मंदांना गलत आंता।

माटु मना कामरेड्स पोरो वेहता बोल्शेविक नियम कुना सही पालन किया मंतोर इंजी दढता ते वेहा परिंतोमा। असल इत्तेके इद्रम इंदा परवोम। इदा प्लीन लोप्पा इदिनकु मुन्ने इदिना बारे ते वडकताद मंता। मति इदिना पोरो पूरा वडकताद हिल्ले। व्यवहार संगे पोरो वेहता नियम वेल्ले बेस मंता इंजी स्पष्ट आता। मति रेंडासी बगिल तल इद नियम ता अतिक्रमण वेल्ले ज्यादा आता। साधारण रूप ते माटु कार्यकर्ता लोरा चुनाव वास्तविक प्रमाण कुना अनुसार चुने कीवोम आंतोम! लेवेके बदमाई चुनाव कींतोम लेवेके खुदता मानसिक रुझान अनुसार चुनाव कीसिंतोम इद्रम आयवेके संकीर्ण प्रादेशिकता ता प्रमाण कुना पोरो आधार आसी चुने कींतोम। साधारण रूप ते राजनैतिक दृष्टि ते चुने कियवा मंदिंतोम अनि तुरंत काम कीयाना लेक्का मत्तादिना पोरो आधार आसी इत्तेके बिजनेस दृष्टिकोण तेने चुने कींतोम। इव रेंडासी दृष्टिकोण किन नजरअंदाज कीसी उंदी तीसरा दृष्टिकोण किन महत्व हिया मंतोम (इत्तेके व्यक्तिगत रूप ते मनम पुंजी मत्ता, दोस्त, मना नाटेनोर, मना बारे ते बेस-बेसता पोल्लोंग कियानोर, मना जीवा कीयाना लेक्काटोर) किन वेने कार्यकर्ता लेक्का चुने किया मंतोम।

इद्रम ता चुनाव पोरो आधार आसी निर्माण आयना संस्थांग हल्कोए जिम्मेदार मत्ता नेतृत्व वाले कार्यकर्ता लोरा संगठन हिल्ला, गर्रे-गर्रे ता, पारिवारिक समूह लेवेके कंपनी लेक्काने मंदिता। इद्रम ता समूह ता सदस्य, वरोर-दूसरो ना पोरो सतर्क मंदिंतोर अनि बोनकिने नुकसान, बोनकिने तिप्पल आयवा लेक्का मंजी वरोर-दूसरोना दोषकु ओसो कमजोरिंग कुन मक्किह कींतोर। तोड्डी मुन्ने बेसता पोल्लोंग कींतोर आराम कलियसी-मिलियसी मंदिंतोर अनि बस्के-बस्के केंद्र लोप्पा तम्मा सफलतांग संबंधित अस्पष्ट शब्द संगे निहची सुंदर रिपोर्ट लोहिंतोर। इद्रम ता सगा-संबंधी वाले परिस्थिति ते गलतिंग ना आलोचनाए आयो आंता ओसो अव संस्थांग ना प्रधान आत्म आलोचना वेने कीवोर आंतोर। अद परिस्थिति ते आलोचना लेवेके आत्म आलोचना ता जरूरते मन्ने आंता इंदानदु सब्बेटोर बेसे पुंजी मंतोम।

कामरेड्स ना काम ता जांच बद्रम कीयाना?

कार्यकर्ता लोरा काम ता जांच इत्तेके बाताल?

कार्यकर्ता लोरा काम ता जांच इत्तेके ओरु बाता किया मंतोर इंजी हूड़ना? लेवेके बद्रम-बद्रम योगदान हिया मंतोर इंजी हूड़ना आंदू? लेवेके ओरा काम ता लक्ष्य बाताल इंजी हूड़ना? काम ता जांच काम ता लक्ष्य आंता, पोल्लोग ओसो योगदान आयो।

कार्यकर्ता तम्मा कर्तव्य कुन बद्रम पूरा कींतोर इंदानदिना जांच इत्तेके ओरा काम ता लक्ष्य किन ऑफिस ता कागज ते हूड़ना लेवेके आदत अनुसार रास्ता रिपोर्ट लोप्पा हूड़ना। इद्रम ता ओरा काम ता रिजल्ट कुन कागज पोरो आधार आसी अंदाजा वाटनादिन जांच इनमूडायो।

साधारण रूप ते वेल्ले कठीन ओसो गंभीर जांच कीयाना जरूरत मंदिता इंजी सवाल वेने तेदिता। बदे डावुट हिल्ला इदिना जरूरत मंता। बारांकु इत्तेके इद्रम कठीन जांच संगेने माटु वरोर कार्यकर्ता किन पूर्ण रूप ते समझेमाया परितोम ओसो ओना स्वभाव, गुण-दोष कुना निर्णय किया परितोम। दूसरा पोल्लो इद्रम ता जांच संगे ने मना कार्यकारी तंत्र ता गुण दोष, कमजोरिंग ना अदांजा वाटा परितोम। तीसरी पोल्लो इद्रम ता जांच संगे मना कर्तव्य तुन मजबूत ओसो कमजोर अंश किन पुंदाना संभव मंदिता।

उचुन कामरेड्स कार्यकर्ता लोरा जांच पोरो स्तर ता नेता लोरो कीतेके बेस मंदिता इंजी इंतोर। ओरु वेने पोरो स्तर ता नेता लोर दोड़ स्तर ता कार्यकर्ता लोरा काम ता रिजल्ट कुना पोरो आधार आसी कित्ता जांचे सही मंदिता इंतोर। मति इद्रम ता विचार वास्तविकता तल वेल्ले जेक मंदिता। कार्यकर्ता लोर किन ओसो कर्तव्य कुन पूरा कीयाना तरीका किन पोरो स्तर तल योग्य रीति ता नेता लोर कीयाना जरूरत मंता।

मति सिर्फ पोरो स्तर ता नेता लोरे जांच कीयानाए जांच कार्य किन पूरा किया परवो आंता। इदे आयवा उंदी दूसरा रकम ता जांच वेने मंता। अदु दोड़ तल पोरो बगिल दांता। जन समूह ओसो दोड़ स्तर ता कार्यकर्ता लोर नेता लोरा निगरानी ओसो जांच किसी ओरा गलतिंग किन तोहना अनि अव गलतिंग किन सुधरे कीयाना तरीकांग हियाना तरीका मंता।

इद्रम जांचपड़ताल कीयाना कार्यकर्ता लोरा ट्रेनिंग कीयाना वेल्ले दृढ़ तरीका मंता।

पार्टी श्रेणिंग, सदस्य-पार्टी कार्यकर्ता लोरा मीटिंग, कान्फ्रेन्स, कांग्रेस लोप्पा नेता लोर हीता रिपोर्ट कुन ध्यान ते केंजतेके ओरा कमजोरिंग, गलतिंग ना आलोचना कीसी पार्टी नेतृत्व वाले संस्थांग काजे ओरकिन चुने कीयाना। इद्रमे नेता लोरा काम ता जांच आंता।

जांच कार्य किन सही तरीका ते पूरा कियाला दोड़ हीता नियम कुन अमल कीयाना। पार्टी नियम अनुसार जनवादी केंद्रीयता किन सही तरीका ते अमल कीयाना, बदे वेने पूर्व शर्त लेवा पार्टी संस्था चुनाव अनुसार काम कीयाना, उम्मीद्वार लोर किन तासना या तेंडना अधिकार गुप्त मतदान ओसो आलोचना ओसो आत्मालोचना किन जारी तासना लेकट्टवु।

पार्टी सदस्य हिल्वा जनता सब्बे रकम ता क्षेत्रकुना लोप्पा तम्मा ट्रेड यूनियन नेता लोरा रिपोर्ट किन केंजना, गलतिंग वेहची सुधरे कीयाना तरीका लागू कीसी नेता लोरा जांच कीयाना।

कैडर लोरा गलतिंग पोरो आधार आसी ओरकिन ट्रेनिंग, प्राक्टिस हियाना।

कैडर लोरा खुद ता गलतिंग पोरो आधार आसी ओरकिन शिक्षित कीयाना इतेके पार्टी कैडर लोर किन सही शिक्षा हियाना, सही तरीका ते विद्या हियाला काजे ओसो सर्वहारा वर्ग ओसो सर्वहारा जन समूह कुन सही शिक्षा हियाला काजे पार्टी ता गलतिंग किन सचेतन रूप ते समझेमायना, अव गलतिंग ना कारण कुना अध्यायन कीसी दूर कीयाना तरीकांग हियाना। पार्टी कैडर, सर्वहारा वर्ग ओसो सर्वहारा जन समूह कुन शिक्षण हियानादु उंदी वेल्ले बेसता तरीका आंदू इंजी लेनिन वेहतोर।

लेनिन वेहता लेक्का "उंदी राजनीतिक पार्टी ता गलतिंग पोरो मंदना दृष्टिकोणे अगाटा पार्टी बचोन गंभीर दृष्टि वाले मंता इंजी वेहिंता?" अद पार्टी ता व्यवहार पार्टी ता तन्ना वर्ग, सर्वहारा वर्ग काजे मत्ता तन्ना कर्तव्य तुन बचोन दृढ़ता ते पालन कींता इंजी वेहिंता। इद विषय लोप्पा अगाटा पार्टी ता व्यवहार किने सही सबूत मानेमायमूडायर। तन्ना गलतिंग किन

स्पष्ट रूप ते पेश कीयाना, अव गलतिंग ना कारण कुन स्पष्ट कीयाना, बढ परिस्थिति ते गलतिंग आता अदिना विश्लेषण कीयाना ओसो अविन बद्रम सुधरे कीयाना इंजी चर्चा कीयानादु पार्टी ता गंभीर लक्षण आदू। इद लक्षण पार्टी तन्ना कर्तव कुना सही पालन कींता इंदानादिना सबूत आंदू। अदु पार्टी तन्ना वर्ग ओसो जन समूह कुन हियाना चेतनापूर्ण शिक्षा इदे आंदू।

इत्तेके तन्ना गलतिंग किन मकिहवा मंदाना हर बोल्शेविक ना कर्तव्य आंदू। साधारण रूप ते माटु मना गलतिंग किन दीर्घकालीन रूप ते अद्रमे तासना कोशिश कीतोम। मति बोल्शेविक बस्केने इद्रम कीवोर। वरोर बोल्शेविक तन्ना गलतिंग किन ईमानदारी ते पेश कीयाना ओसो कबूल कीयाना। अव गलतिंग किन सुधरे कियाला सुझाव ईमानदारी ते स्वीकार कीयाना अनि ईमानदारी ते ओसो स्पष्ट रूप ते सुधरे कीयाना।

नन्ना मना ज्यादातर कामरेड्स इद काम किन खुशी ते किया मंतोर इंजी इंदा परवोन। मति वरोर बोल्शेविक सच्चा बोल्शेविक मंदाना इत्तेके ओरु तन्ना गलतिंग किन स्पष्ट रूप ते स्वीकार कीयाना अविना कारण कुना अध्ययन कीयाना ओसो स्पष्ट रूप ते अविन सुधरे कीयाना सुझाव कुन स्वीकार कीयाना हिम्मत मंदाना। अस्के ने पार्टी कैडर किन सही प्रैक्टिस, सही राजनैतिक शिक्षण दोरिंकता। इदे उंदी हर्दे इत्तेके खुल्लेआम आत्मालोचना कीसीए बोल्शेविक पार्टी कैडर सच्ची शिक्षा दोरकिह किया परितोर, बोल्शेविक पार्टी ता नेता वेने सच्ची शिक्षा दोरकी किया परितोर।

उचुन कामरेड्स "बदे गलति खुल्लम खुला पेश कीयाना सही हिल्ले इंजी" इंतोर। मना दुश्मन इदिन मना कमजोरी समझेमायनूर अनि इदिना गलत फायदा एताना कोशिश कियानूर इंतोर।

कामरेड्स इद्रम आल्सना अंगडम मंता। मना गलतिंग किन खुल्लम खुल्ला मानेमातेके ईमानदारी ते सुधरे कीयाना कोशिश कीतेके मना पार्टी मजबूत आंता। सर्वहारा वर्ग, किसान ओसो सर्वहारा वर्ग ता बुद्धिजीविरा कोंडा ते पार्टी ता अधिकार ओसो ज्यादा बेरसिंता। मना राज्य, सरकार ता अधिकार किन ओसो ज्यादा बेरसी कियाला मदद आंता। सर्वहारा वर्ग किसान ओसो सर्वहारा वर्ग बुद्धिजीविर मावा संगे मत्तेके बाकी सब्बे पोल्लोंग तम्मा-तम्माए बेस आयनुंग।

उचुन कामरेड्स मना गलतिंग किन खुल्लेआम स्वीकार कीतेके मना कैडर लोरा शिक्षण काजे ओसो ओरा मजबूती काजे नुकसान कीयाना लेक्का मंता इंतोर। इद्रम कीतेके ओरु कमजोर आयनूर। अदिन काजे माटु मना कैडर लोरा गलतिंग पोरो केमेक मंदाना अनि इद्रम कीसी ओरा आत्म सम्मान ता ओसो मानसिक शांति ता रक्षा कीयाना। ओरु कैडर लोरा मानसिक शांति ता रक्षा काजे सुझाव हीसोरे ओरा गलतिंग हूइसी केमेक मंदाना, आलोचना कीतेके वेने वेल्ले तीखा आलोचना कीयानायो, वेल्ले शांति ते आलोचना कीयाना इंतोर। ओरा गलतिंग किन नजरअंदाज कीसी बाहर वायला हियवेके ओसोए बेस इंतोर।

सैद्धांतिक रूप ते इद पक्काए गलत हर्रि मंता। अदे आयवा इद खतरनाक हर्रि वेने मंता। माटू बोना रक्षा कियाला आल्सिंतोम, बोना गलतिंग किन नजरंदाज कींतोम, बोना आलोचना किवोम अदिनागडल ओराए नुकसान वेल्लाए आयर। बद कामरेड्सकुना माटू आलोचना किवोम, गलतिंग कुन नजरंदाज कींकोम ओरा माटू पूराए सर्वनाश कियाकोम। इद सही आयो।

लोकुर किन करहना अनि लोकुरिगडल करियाना

लेनिन वेहता लेक्का माटु लोकुर किन करहानाए आयो, ओरगडल माटु करियाना वेने मंता। इत्तेके पहली पोल्लो इद्रम ता नेता लोर चालबाज इनपडे मंदानायो। माटु केंद्र कमेटी सदस्य आया परितोम लेवेके प्रजा कमीसार आया परितोम इंदाना पोल्लो किन माटु सही ओसो पूर्ण रूप ते समझेमायना। सिर्फ इद्रम कीतेकेने सही नेतृत्व कीयाना क्षमता ओसो बुद्धि दोरको आंता। पद तन्ना-तन्ना बुद्धि ओसो अनुभव हीवो आंता।

दूसरा पोल्लो - सही नेतृत्व हियाला काजे सिर्फ तन्ना अनुभवे हालनाचोन हिल्ले। सही नेतृत्व हियाला काजे तन्ना अनुभव इत्तेके नेता लोरा अनुभव संगे-संगे बेहरा जन समूह ना अनुभव किन पार्टी ता साधारण सदस्य लोरा अनुभव किन जोड़े कीयाना। इद्रम कीयाना वेने जरूरी मंता।

तीसरा पोल्लो- लोकुरा संगे मना संबंध किन उचुन वेने कमजोर आयला हियानायो। ताना लोप्पा उचुन वेने अंतर आयला हियानायो।

चौथा पोल्लो- लोकुरा पोल्लोंग किन महत्व हियाना। ओरु बाता वड़किंतोर अदिन ध्यान ते केंजना अनि ताना पोरो पूरा ध्यान हियाना। लोकुरा पोल्लोंग किन, पार्टी ता साधारण सदस्य लोरा पोल्लो किन, “सुडला” समझेमायना साधारण लोकुरा पोल्लोंग किन ओसो जनता ना लेंग किन ध्यान ते केंजना।

सही नेतृत्व हियाना इत्तेके?

ऑफिस लोप्पा उदसी आदेश लेवेके सूचनांग रासना इंजी आयो।
सही नेतृत्व इत्तेके इदु बिल्कुले आयो।

सही नेतृत्व हियाना अर्थ इत्तेके -

पहली - समस्या ता सही समाधान पहरकना। मति जनता ना अनुभव किन पोयवा लेवा महत्व हियवा लेवा समस्यांग ना सही समाधान परहका परमूडायो। बारांकु इत्तेके नेता लोरा आदेश सही मंता या गलत मंता इंदानदु लोकुरा अनुभव तले पुनमूडांता।

दूसरा - लोकुरा साहयता हिल्लवेके सही समाधान किन व्यवहार ते जोड़े कीयाना संभव आयो आंता।

तीसरा - निर्णय कुन अमल कीयाना तरीकांग ना जांच कीयाना। इदु काम वेने लोकुरा सीधा सहयोग हिल्ला संभव हिल्ले।

माटु नेता लोरा पोल्लोंग, घटनांग किन ओसो लोकुर किन उंदे बगिल तल हूडिंतोम। इत्तेके माटु सिर्फ पोरोटले हूडिंतोम। इदिन काजे माटु वेल्ले कम हूडा परिंतोम। अदिन उल्टा लोकुर घटनांग, लोकुर किन दूसरा बगिल तल हूडिंतोर इत्तेके दोड़ स्तर तले हूडिंतोर। अद्रमासी, ओरा कोंडा ते वेने वेल्ले सीमित पोल्लोंगे दिसिंतांग। बदे आई समस्या ता समाधान काजे इव रेंडु दृष्टिकोण, अनुभव कुन काल्पा लागियर। इद्रम कीतेकेने नेतृत्व सही दिशा ते मंदा परिंता।

“सिर्फ लोकुर किन करहानाए आयवा ओरगल करियाना वेने मंता”
इंदाना पोल्लो अर्थ इदे आंदू।

इद्रम ता सिर्फ मना अनुभव इत्तेके नेता लोरा अनुभव कार्य निर्वाहरण काजे हालो आंता। सही नेतृत्व हियाला काजे नेता लोरा अनुभव

संगे पार्टी ता अनुभव ओसो बेहरा जन समूह ता अनुभव वेने जोड़े किया लागिंता। सर्वहारा वर्ग ता अनुभव ओसो "सुडला" समझेमायना साधारण लोकुरा अनुभव कुन नेता लोरा अनुभव कुना संगे जोड़े कीसी पूरा कीयाना।

इद्रम बस्के किया परितोम?

नेता लोर लोकुरा संगे वेल्ले गरे ता संबंध तासतेके ने इद्रम कीयाना संभव आंता। पार्टी, जन समूह संगे गठजोड़ किसी कलियसी मत्तेकेने इद्रम कीयाना संभव आंता। ओरु सर्वहारा वर्ग, किसान ओसो सर्वहारा वर्ग बुद्धिजीविरा संगे मजबूती ते एकता कीतेके ने संभव आंता।

लोकुरा संगे संबंध जोड़े कीयाना ओसो अव संबंध कुन मजबूती ते विकसित कीयाना ओसो जनता ना लेंग केंजला काजे हमेशा तैयार मंदाना। बोल्शेविक नेतृत्व ता सही ताकत तीना लोप्पाने मंता। बोल्शेविक बस्के एवनल बेहरा जन समुह संगे संबंध तासितोर अस्के एवनल ओरकिन बोरे हारे किया परवोर आंतोर। इदु उंदी सही नियम आंदू। इदिना उल्टा, बोल्शेविक लोकुरिगडल अलग आतेके, लोकुरिगडल संबंध देगतेके ओरकिन अधिकार रोग आंता, अनि ओरा कोंडांग हूड़ा वेसवा लेक्का आंतांग अनि ओरु तम्मा ताकत सब्बे पोहची सिर्फ लोप्पटल डोढरी लेक्का आंतोर।

ग्रीक ता पाइना पीटो लोप्पा एंटियस पोरोल ता वरोर वीर मत्तोर। ओरु समुद्र देव (भगवान) पोसिडन ओसो भूमदेवी पीटो ता मर्री मत्तोर। ओनकिन ओना यायल वेल्ले जीवा कीसी सुरक्षित रूप ते पालन-पोषण कीसी बेरसी कित्ता। ओरु तन्ना यायन किन वेल्ले जीवा कीयानोर अनि वेल्ले गरे वेने मंदानोर। बेहरा आतास्के एंटियस वेल्ले बेहरा वीर बनेमातोर। ओरु दुनिया ता सब्बे वीर लोर किन वेरियी कीतोर। ओरकिन दुनिया ता बाकी वीरलोर ओनकिन जीड़वा परवा मानेमायनोर। इत्तेके ओना ताकत बेगडल मत्ता?

दुश्मन संगे बस्के वेने कड़ा मुकाबला आयनदु ओसो लड़ेमासी-लड़ेमासी दोगतास्के ओरु ओनकिन पुट्टी कीसी कोरा ते पोयसी पाले-पोसे

कीता भूदेवी किन बोयानोर। इद्रम कीतेके ओना लोप्पा पूना ताकत वायनदु। मति ओना लोप्पा उंदी कमजोरी वेने मत्ता, ओरु भूमि तल जेक आसी अदिन मरंगसी, इद्रम ता खतरा ते अर्रानोर। ओना इद कमजोरी तिंची फायदा एतसी ओनकिन हारे कियाला काजे दुश्मन तोर हमेशा हर्ी हूइसोर मंदानोर। इद्रम वरोर दुश्मन इद कमजोरी ता फायदा एतसी ओनकिन हारे कीसितोर। ओना पोरो हेर्कुलेस मत्ता। हेर्कुलेस एंटियस किन बद्रम हारे कीतोर? ओनकिन भूमि तल जेक कीसी, वडिय ते पोरो तेहची अगाने चित्त कीसितोर।

नावा हिसाब ते बोल्शेविक, वीर ग्रीक पौराणिक वीर एंटियस ना लेक्का मंतोर। एंटियस नाए लेक्का बस्के तम्मा यायल इत्तेके पाले-पोसे कीसी बेरसी कीयाना जन समूह गरे मंतोर अस्के एवनल शक्तिशाली मंदिंतोर। अन्नि बस्के एवनल लोकुरा गरे मंतोर अस्के एवनल ओरु हारेमाया परवोर आंतोर।

बोल्शेविक नेतृत्व ता ताकत इदे जन समूह आंदू।

पार्टी प्रशिक्षण ओसो पार्टी आंतरिक लोकतंत्र

एल. एम. कगनोविच

लोकुर ऑफिस कामकाज तल ओसो आम प्रस्ताव कुन रासना तुकू वेल्ले दबाव वाता लेक्का आंतोर अस्के ओरु सुडला चीज कुन नजरअंदाज कींतोर, लोकुर किन नजरअंदाज कींतोर। ओरु पूना मुखिया, पूना इंजिनियर, पूना तकनीशीयन, मजदूर लोरा पूना नेता लोर ओसो युवा कम्युनिस्ट लोर किन हूडला असफल आंतोर। वीर सब्बे इंजे-इंजे पोरो वाया मंतोर। वेर किन पूना काम पोरो पदोन्नति किया परमूडांता।

मनगा मानेय ना कमी मंतामति इंजी लोकुर इंतोर। इद पोल्लो गलत मंता। मनगा मानेय मंतोर ओसो योग्य मानेय वेने मंतोर। मति माटु ओरा पदोन्नति किया परना लेक्का बनेमायना जरूरत मंता। ओरा नेतृत्व कियाला काजे माटु योग्य बनेमायना जरूरत मंता। बदे काम ते मानेय किन तासतोम अद काम ता ओरकिन ट्रेनिंग हीयाना। ओरकिन काम ता प्रक्रिया ते पोरो तेहना। ओरु अयोग्य ओसो बेकार आयवा मंदांना इंजी ओरा पोरो कोंडा तासिसी मंदांना। ओरा पोरो उदना डुंडुल किन साफ कीसोरे मंदांना।

पार्टी ता सदस्य लोरकिन पूरा स्वीकृत कीयाना ओसो ओरा संगठन बने कीयाना मना पूरा कर्तव्य लोप्पा सिर्फ आधा कामे आंदू। पूना सदस्य लोरा पोरो माटू पक्काए ध्यान हियान इत्तेके बस्के एवनल ओरु मना स्तर एवनल एवितोर अस्के एवनल पूर्ण रूप ते आदर्श बनेमांतोरा, मायोर, लेवेके मुन्ने दांतोरा, हन्नोर, तम्मा रोज ता कामकाज लोप्पा सही मार्गदर्शन ओरकिन दोरकिंता या दोरको, पार्टी काम लोप्पा मेहनती मंतोरा, हिल्लेर इंदाना पोरो ध्यान हियाना। माटु मार्क्सवादी-लेनिनवाद ट्रेनिंग ता पोल्लोग

कींतोम अस्के माटु सिर्फ स्कूल के हीयना शिक्षा, ट्रेनिंग ता बारे ते आयवा माटु बोल्शेविक आदर्श ता बारे ते वड़किंतोम। पार्टी सदस्य, पार्टी विद्यालय लोप्पा जरूर प्रशिक्षित कीयाना, मति प्रधान रूप ते ओरकिन व्यवहारिक राजनैतिक काम पोरो प्रशिक्षित कीयाना वेल्ले जरूरी मंता। इत्तेके पार्टी सदस्य लोरा मार्क्सवादी-लेनिनवादी प्रशिक्षण किन उच्च स्तर एवनल तेहना अनि पार्टी संगठन कार्य किन विकसित कीयानादु मंता।

लेनिन रोज ता व्यवहार संगे सैद्धांतिक समस्यांग किन हमेशाए जोड़े कीतोर। “वेल्ले लेस्कसी मत्ता सैद्धांतिक समस्यांग किन बद्रम रोज ता संघर्ष संगे जोड़ कीयाना?” स्टालिन इदिना बारे ते बचोनो उदाहरणकु हीतोर। मति मना बचोनो “लाल प्रोफेसर” सिद्धांत किन उंदी डब्बा ते तासिंतोर अनि दूसरा डब्बा ते प्रयोग कीतोर। इव रेंडासी डब्बांग किन काल्पना लोप्पा मना “लाल प्रोफेसर” लोर इनपड़े अयोग्य मंतोर। इद्रमासी सिद्धांत किन व्यवहार संगे जोड़े कीयाना जागा ते मनोवैज्ञानिक लोरा लेक्का अंगड़म ता कल्पना कीसोरे “उंदी कील्क ता प्रकृति” पोरो उंदी बेहरा ओसो गंभीर पुस्तक रासिंतोर मति मार्क्स ओसो एंगेल्स इदिना बारे ते बातले वेहताद हिल्ले। अदिन काजे इद्रम ता महान लोकरु मार्क्सवादी भंडार लोप्पा ओरा बेहरा योगदान मंता इंजी आल्सिंतोर।

मना सोवियत पार्टी स्कूल लोप्पा शिक्षा किन बिल्कुले साधारण स्कूल तरीका ते शिक्षा हियाना रोग लेक्का आता। वरोर बोल्शेविक साधारण-विद्यालय ता छात्र किन शिक्षा हियाना लेक्कटा छात्राल आयोर। ओना शिक्षा रोज ता राजनीति ओसो व्यवहारिक संघर्ष संगे जुड़ेमासी मंता। बोल्शेविक लोर किन पार्टी स्कूल ओसो पार्टी सम्मेलन रेंडासी ना लोप्पा सिद्धांत, आदर्श संगे सुधरे कीयाना। बारांकु इत्तेके मना पूना लेखनशैली लोप्पा सिर्फ शिक्षण हियाना इंजी आयवा कम्युनिस्ट लोर किन सैद्धांतिक रूप ते तैयार कीयाना इंजी रास्तद मंता। हर पार्टी सदस्य किन मार्क्सवादी-लेनिनवादी सिद्धांत संगे ट्रेन कीयाना।

माटु साधारण पार्टी सदस्य लोरा काजे सैद्धांतिक रूप ते बेस ट्रेन आयना मांग कींतोम इत्तेके पार्टी नेता लोरा काजे इदिना बचोन जरूरत मंता इंदानदु मीटु आल्सा परिंतिर। निपुण प्रचार कियानोर ओसो कुशल

कार्यकर्ता लोरा नइमा ज्यादा विभाजन आयनायो। विशेष रूप ते इद उंदी वेल्ले बेसता पोल्लो मंता। मति इदे सब्बे तल बेहरा इंजी इंदना आयो। इदिन पुराए साधारण बने कित्तेके अद पार्टी काम काजे सही हिल्ले। बचोनो बेरा वरोर संगठनकर्ता, प्रचार ओसो आंदोलन ताकी कीयाना लोप्पा असफल आया परितोर। इदिना कारण संगठनकर्ता लोरगा हालनाचोन टाईम हिल्ले इंजी आयवा ओरु अद काम किया परवोर इंजी आंता। माटु उंदी कारखाना ता हेड किन पक्काए ज्ञान ता जरूरत मंता इंजी हूडिंतोम। अद्रमे हर पार्टी कमेटी ता सेक्रेटरी, हर जिला कमेटी ता सेक्रेटरी ओसो हर पार्टी संगठनकर्ता मार्क्सवाद-लेनिनवादी सिद्धांत किन मशीन लेक्का इस्तेमाल कीयाना बेसता ज्ञान लेवेके योग्यता ता मांग किन समझेमायना। वरोर पार्टी नेताल बेसता संगठनकर्ता ओसो प्रशासक आयवा वरोर बेसता प्रचारक ओसो पार्टी सदस्य लोरा अध्यापक वेने मंदाना।

माटु मना पार्टी सम्मेलन कुना स्तर पोरो तेदतादु पुत्तोम। पार्टी सदस्य पार्टी स्कूल लोप्पा बचोन साम्यवाद ता बारे ते करियंतोर, ओरा बराबर लेवेके अदिनकु ज्यादा मात्रा ते पार्टी सम्मेलन कुना लोप्पा करिया मंतोर। इंदनदिन सब्बे तोर पुत्तोर।

पार्टी ता आंतरिक लोकतंत्र ओसो आत्म-आलोचना मना पूरा पार्टी ता काम ओसो सदस्य लोरा शिक्षा ता वेल्ले महत्वपूर्ण अंग मंता। पार्टी आंतरिक लोकतंत्र किन इंजे उंदी पूना स्तर एवसी कीताद मंता। अदु इंजे उंदी पूना रूप ते समझेमायना लेक्का मंता। इंजे मीटु बोल्शेविक लोरा सम्मेलन ते हाजिर आतेके इविना तुलना उचुक साल मुन्नेटा स्तर कुना संगे कियमूडांता इंजी अनुभव कियाकिर।

माटु वेल्ले बेस ता काम कित्तोम, मति संगठकर्ता ओसो प्रचारक लोरा काम लोप्पा तालमेल कीयाना लोप्पा सफल आतेके ओसो ज्यादा कीसी मन्नेम। इदिनगडल साम्यवादीरा मार्क्सवादी-लेनिनवादी सैद्धांतिक संपन्नता किन उंदी पूना स्तर दोरकिंता। बदे गंभीर तैयारी हिल्लाए मेडी कोंदा लेक्का आदत अनुसार सम्मेलन ताकी कीयाना वेने आता इत्तेके लोकर किन उंदी जागा जमा कीसी ओरकिन मनगा वेल्ले काम मंता इंजी

वेहताद मंता। माटु इव काम कु पूरा कीयाना इंजी वेहताद मंता। ज्यादा से ज्यादा बदे अभियान, वर्षगांठ किन चर्चा किसी सम्मेलन आंता। इद्रम ता सम्मेलन लोप्पा असल ते मीटु परई ता कोलार केंजतीर लेवेके "धंधा" संबंधित चर्चा लेक्काने ज्यादा केंजतीर। वास्तविक रूप ते इद्रम ता सम्मेलन पार्टी सदस्य लोर किन शिक्षित कियाल मदद कीवोंग आंतांग। मति हर पार्टी सम्मेलन साम्यवादिरा सैद्धांतिक स्तर किन पोरो तेहला मदद कीयाना लेक्का मंदाना।

पार्टी सदस्य, पार्टी ता आंतरिक लोकतंत्र ता परिस्थिति ते पार्टी नीति ना सब्बे सवाल कुना स्वतंत्र ओसो नियमबद्ध वाद-विवाद नइमा पुट्टितोर, शिक्षित अनि मजबूत आंतोर। इद्रम आयनास्केने पार्टी नीति ता मूल समस्यांग नल अलग आयना, पार्टी नीति किन गलत तरिका ते नष्ट कियला काजे समस्यांग ना वाद-विवाद ता फायदा एतना, पार्टी नेतृत्व किन नुक्सान कीयाना ओसो अदिना सुहृद स्तर तुन बिगड़े कियाला विरुद्ध सख्ति ते संघर्ष कियाला तैयार आंतोर। पार्टी आंतरिक पिस्वल ता अनुभव मना किन बातल तोहिंता इत्तेके मना पार्टी स्तर मना पार्टी नीति तुक अलग आंतोर। लेनिनवाद तल अलग आंतोर ओसो पार्टी तुन सुहृद ओसो एकीकृत कीयाना संघर्ष कुनल वेने अलग आंतोर सब्बे खिलाफ संघर्ष संघर्ष किसोरे विकसित, मजबूत ओसो गट्टिक आत्ताद मंता।

अदिन काजे पार्टी ढांचांग लोप्पा बेगा बचोन कम मात्रा ते अवसरवाद दिसिंतायो अदिना खिलाफ संघर्ष कीसोरे अदे संघर्ष, लोप्पा पार्टी सदस्य लोरा स्तर किन पोरो तेहना अनि सख्त बने कीयाना काम किन जारी तासना।

पार्टी सदस्य लोरा विकास पार्टी आंतरिक काम, संगठनात्कम तरीका पोरो निर्भर मंदिंता। पार्टी सदस्य लोरा पोरो बचोन ध्यान हींतोम, ओरकिन मुन्ने ओयना तरीकांग पोरो वेने आधार आसी मंता।

कैडर लोरा बारे ते

जी डिमिट्रोव

कामरेड्स, मनगा प्रस्ताव कुन अमल कीयाना लोकुरा कमी मत्तेके मना बेसबेसता प्रस्ताव वेने कागज कुना डग्गी पोयसिए मंदानुंग। मना मुन्ने कैडर लोरा समस्या उंदी वेल्ले महत्वपूर्ण सवाल लेक्का मंता, मति इद सभा ता ध्यान ते अदिना काजे जागा हिल्वा लेक्का मंता इंतान। इंटरनेशनल कम्युनिस्ट कमेटी ता रिपोर्ट पोरो चर्चा सात दिव्यांग ताकता। इद चर्चा लोप्पा अलग-अलग देश कुना बचोनो वक्ता लोर शामिल आतोर। मति, साम्यवादी पार्टिंग ओसो मजदूर आंदोलन कुना काजे वेल्ले जरूरी सवाल पोरो सिर्फ उचुने वक्ता लोर ध्यान हीतोर। मना पार्टी, तन्ना व्यवहारिक काम लोप्पा इंजे वेने लोकुर ओसो कैडर सब्बे तय कींतोर इंजी समझदारी दोरकी कीयाना तुक्क वेल्ले जेक मंता। स्टालिन मना किन "कैडर लोरा लोप्पा सुधार तत्ताना। माली तन्ना अनुकूल पंडी हियाना मर्ग कुना रोपे कींतोर अद्रमे मना लक्ष्य काजे जरूरी लोकुरा, कैडर, श्रमिक लोर किन इज्जत हियाना ओसो ओरकिन मना आदर्श संगे ट्रेन कीयाना" इंजी वेहतोर।

कैडर लोरा समस्या बारे ते मना दृष्टिकोण नजरअंदाज कीयाना लेक्का मंदानायो। बारंकु इत्तेके माटु मना कीमती कैडर लोर किन हमेशाए संघर्ष लोप्पा पोहचोरे मंदिंतोम। माटु उंदी बौद्धिक समाज ता लोकुर आयवा उंदी लड़ाकू आंदोलन ता लड़ाकू सैनिक लोर आंदोम। हमेशा तुपाई ता निशाना ते मंदिंतोम। मना सर्वोत्तम शक्ति वाले, सर्वोत्तम साइंस वाले ओसो सर्वोत्तम वर्ग चेतना वाले कैडर हमेशाए हंदी पोरो मंदिंतोर। हंदी पोरो

काम कियानोर हमेशाए दुश्मन ता शिकार आंतोर इंदानदु स्पष्ट मंता। दुश्मन ओरकिन हौकिंता, जेल ते वाटिंता, कैंपकुने तासिंता, यातना हीसि ओरकिन हौकिंता। फासीवादी देश कुना लोप्पा इद्रम तादिना स्तर वेल्ले बेहरा मंता। कैडर लोरा कमी किन पूरा कियाला काजे पद बेरसी कीसी पूना कैडर लोरकिन भरती कीसी इद्रम ता मना श्रेणिंग किन लगातार भरती कीसोर मंदाना। पूना कैडर लोरा पोरो ध्यान हियाना ओरकिन तुरंत प्रशिक्षण हियाना वेल्ले जरूरी मंता। सावधानीपूर्वक वर्तमान कैडर लोरा रक्षा कीयाना वेने जरूरत मंता।

मना प्रभाव ते संयुक्त जन मोर्चा आंदोलन तेज आतांकु कैडर लोरा समस्या उंदी विशिष्ट ओसो फौरी जरूरत लेक्का मंदाना ता कारण मना प्रभाव ते मत्ता संयुक्त जन मोर्चा आंदोलन किन गति दोरकता। अद्रमासी बचोनो हजार मजदूर लड़ाकू लोर मुन्ने वातोर। मना पार्टी लोप्पा शामिल आयना हजोरो लोकर युवा क्रांतिकारी हिल्लेर। इंजे क्रांतिकारी बनेमाता मजदूर वेने हिल्लेर। वीरू बस्केने बदे रानीतिक आंदोलन लोप्पा शामिल आतोर वेने हिल्लेर। वीरू सब्बेतोर सामाजिक लोकतांत्रिक पार्टिंग नो पूर्ववर्ती सदस्य लोर आंदुर, वीरू मना श्रेणी लोप्पा पोंगसोरे वातोर। पोरो वेहता पार्टिंग ना लड़ाकू तत्व वेने मना पार्टी लोप्पा शामिल आया मंतोर। इद्रम ता पूना कैडर लोरा पोरो विशेष ध्यान हियाना जरूरत मंता। बारांकु इत्तेके मना व्यावहारिक कार्य लोप्पा तम्मा न्यूनतम सिद्धांतवादी प्रशिक्षण पोरो आधार आसी बेहरा ओसो गंभीर समस्यांग किन खुदे हल कियानोर वेने मंतोर।

“कैडर संबंधित सही नीति बाताव मता?” मना पार्टी काजे इदु बेहरा समस्या मंता। संगे युवा साम्यवादी संगठन, ओसो बाकी संगठन कुना काजे ओसो क्रांतिकारी श्रमिक आंदोलन कुना काजे वेने इदु उंदी गंभीर समस्या मंता।

“कैडर लोरा बारे ते सही नीति ता विचार बाताल मंता?”

पहला- मना लोकर किन “कैडर लोर किन” चिन्हित कीयाना!

मना पार्टी लोप्पा कैडर लोरा अध्ययन ता बदे नियम हिल्ले। इंजे सिर्फ फ्रान्स, पौलेंड ओसो पूर्व ते चीनी कम्युनिस्ट पार्टिंग इदिना लोप्पा

उचुन सफलतांग दोरकी कीतांग। जर्मनी कम्युनिस्ट पार्टी वेने भूमिगत आयनास्के कैडर लोरा अध्ययन कीसी मत्ता। इव पार्टिंग तम्मा लोकरा अध्ययन कीयाना शुरू कीतास्के मुन्ने पुनवा मत्ता कार्यकर्ता लोर किन दोरकी कीयाना अनुभव दोरकी कीतांग। दूसरा बगिल इद अध्ययन संगे विरोधी तत्व कुनल वेने पार्टी शुद्ध आयना शुरू आता। सैद्धांतिक ओसो राजनैतिक रूप ते नुकसान कीयाना तत्व कुन पार्टी तल तेंडता पेरके पार्टी ता शुद्धिकरण वेने शुरू आता। इदिना बारे ते फ्रान्स ता “सेलर” ओसो “बारले” ना उदाहरणकुना बगिल हूड़ा परितोम। इविन बोल्शेविक दूरबीन संगे जांच कीतेके इरवुरासी वर्ग दुश्मन ता प्रतिनिधि मत्तोर इंजी स्पष्ट आता। ताना पेरके वीर किन पार्टी तल बहिष्कार कियमूडाता। पोलैंड ओसो हंगरी लोप्पा वेने कैडर लोरा जांत विरोधी तत्व ओसो बचोनो तरीका ने तम्मा सच्चाई किन मक्की कीसी मत्ता दुश्मन ता प्रतिनिधिर किन परहकता।

दूसरा - कैडर लोरा पूर्ण पदोन्नति - कैडर लोरा पदोन्नति अचानक कीयाना काम आयो। इदु पार्टी ता उंदी आम प्रक्रिया आंदू। इद पदोन्नति लेवेके प्रमोशन पार्टी ता संकीर्ण मान्यतांग पोरो आधार आसी, पक्षपात पूर्ण रूप ते समझेमायवा लेवा प्रमोशन कीयानादु आयो। पदोन्नति बदे विशिष्ट क्रिया कलाप ते पार्टी कार्यकर्ता लोरा योग्यता ओसो कुशलता पोरो आधार आसी कीयाना। मना पार्टी ता पदोन्नति ता उदाहरण कु बेसता रिजल्टकु हीतांग।

उदाहरण तुकू मनगा उंदी स्पेन ता महिला साम्यवादी मंता “कामरेड डोलरेस”, अदु इंजे इद सभा ता अध्यक्ष पद ते मंता। रेंडु साल मुन्ने अदु उंदी आम पार्टी कार्यकर्ता मत्ता। मति पहलिए बेरा वर्ग दुश्मन ता मुठभेड़ लोप्पा उंदी जबरदस्त आंदोलन कर्ता ओसो लड़ाकू मत्तादु दिसता। पार्टी ता नेतृत्वकारी पद ते पदोन्नति पेरके अदु पार्टी काजे वेल्ले योग्य सदस्य लेक्का योगदान हीता।

नन्ना बाकी देश कुना लेक्का बचोनो उदाहरणकु हिया परितान, मति ज्यादातर समस्यांग लोप्पा पदोन्नति असंगठित ओसो डामाडोल तरीका ते कीताद मंता अदिन काजे हमेशा सही आयो आता। बस्के-बस्के बोल्लानोर,

हट्टिंग वाटानोर ओसो आदेश हियानोर नेतृत्वकारी पद कुना काजे पदोन्नति कियमूडाता अद्रमासी असल ते मना लक्ष्य किन नुकसान आता।

तीसरा - कैडर लोर किन सर्वोत्तम उद्देश्य ते काम वायना लेक्कटा चुने कीयाना योग्यता।

मनम हर सक्रीय सदस्य ना मूल्यवान विशेषतांग ना जांच ओसो इस्तेमाल कीयाना लेक्का मंदाना। इदा आदर्शवाद मानेय मन्त्रोर आंतोर। ओरु बद्रम मंतोर अद्रमे मनम ओरकिन पोय्यना ओसो ओरा कमजोरिंग, दोष कुन सुधार कीयाना। माटु मना पार्टी लोप्पा, चमक-धमक कीयाना ओसो ईमानदार कार्यकर्ता लोरा गलत इस्तेमाल ता उदाहरण किन पुत्तोमे। ओरु कीयाना लेक्का काम हीतेके ओरु वेल्ले काम वायना लेक्का मंतोर।

चौथा - कैडर लोरा वितरण - सबे मुन्ने माटु आंदोलन ता मुख्य कडिंग जनता ना संपर्क ते मत्तोर, जनता ना लोप्पाटल वातोर, सक्रीय ओसो अटल मत्तोर कैदे मंदाना लेक्का हूडाना। महत्वपूर्ण जिला लोप्पा पोरो वेहता लेक्का लडाकू लोरा संख्या ज्यादा मंदाना। पूंजीवादी देश कुना लोप्पा कैडर लोर किन उंदी जागा तल दूसरा जागा ते लोहना वेल्ले हल्को हिल्ले। इद्रम काम लोप्पा बचोनो रकम ता बाधांग ओसो मुश्किलकु वांतांग। आर्थिक कमी ओसो पारिवारिक मुश्किलकु वेने मंदितांग। इव सब्बे पोल्लोंग किन ध्यान ते तासना। मति ज्यादातर इव पोल्लोंग किन नजरअंदाजे कियमूडाता।

पांचवा - नियमानुसार कैडर लोर किन सहयोग कीयाना। कैडर लोर किन सावधानी पूर्वक निर्देश हियाना। कामरेड्स ना लेक्का नियंत्रण कीयाना। दोष ओसो गलतिंग किन सुधरे कीयाना। नित्य कार्यकर्ता लोरा लोप्पा सुदृढ मार्ग दर्शन हियाना।

छठा - कैडर लोरा सुरक्षा काजे पूर्ण सावधानी। प्रतिकूल परिस्थिति वातेके कार्यकर्ता लोर किन ओरा इलाका तल तेंडसी जल्दिए पिछली पंक्ति ते ओयना। अनि ओरा जागा ते दूसरा कैडर लोर किन वाटना। पार्टी नेतृत्व विशेष रूप ते पार्टींग गैर कानूनी मंदाना देश कुना लोप्पा कैडर लोरा सुरक्षा काजे सबसे पहली जिम्मेदारी तम्मा पोरो एतना

इंजी माटू मांग कीयाना। तन्ना भूमिगत आयनास्के झेलेमाता जर्मनी कम्युनिस्ट पार्टी ता रोमांचकारी नुकसान कुन सुरता कीमूट।

कैडर लोरा बारे ते सही नीति लागू कीसिए मना पार्टिंग तन्ना लोप्पा मत्ता ताकत किन पूरा विकास ओसो इस्तेमाल किया परिंता। इद्रमे बेहरा जन आंदोलन भंडार तल पूना ओसो बेसता सक्रीय कार्यकर्ता लोर किन बस्के इत्तेके अस्के भर्ती किया परिंता।

कैडर लोरा चुनाव लोप्पा मुख्य मापदंड बाताल मंदाना।

पहली - मजदूर वर्ग बारे ते पूर्ण निष्ठा, पार्टी प्रति विनम्र ओसो आज्ञाकारी मंदाना। दुश्मन मुन्ने, लड़ाई लोप्पा, जेल ते ओसो कोर्ट लोप्पा दढ़ ओसो अटल मंदाना।

दूसरा - जनता संगे गरे ता संबंध तासानोर मंदाना। कामरेड्स तम्मा-तम्मा क्षेत्र ता लोकुरा उद्देश्य लोप्पा पूरा मुडंदसी मंदाना। जनता ना रुचि, ओरा पिस्वल, ओरा विचारकु ओसो जरूरत कुन चीनेमायनोर मंदाना। मना पार्टी संगठन ता नेता लोरा प्रतिष्ठा, सबसे मुन्ने जनता ओरकिन तम्मा नेता लेक्का मानेमायना ओसो जनता तम्मा निजी अनुभव तल ओरकिन नेता लेक्का मानेयमाना, ओरा योग्यता पोरो विश्वास कीयाना। संघर्ष लोप्पा अगड़ा जनता अद नेता लोरा दढ़ निश्चय ओसो आत्म बलिदान पोरो निर्भर आसी मंदिंता।

तीसरा - बदे विषय ता मुन्ने ओसो पेरके रिजल्ट कुन स्वतंत्र रूप ते पुंदाना लेक्का ओसो निर्णय कीयानास्के जिम्मेदारी एतना लोप्पा निडरता। जिम्मेदारी एतला वेरियंतोर ओरु नेताल आया परवोर। बोर निर्णय कीयाना लोप्पा समर्थ हिल्ले - “नन्ना, वेहता कामे कियाकान” इंदानोर ओरु सच्चा साम्यवादी मन्त्रोर आंतोर। हारेमायनास्के वेने तल्ला वरिहवा मंदानोर ओसो सफलतांग दोरकतास्के तल्ला तेहवा मंदानोर ओसो निर्णय कुन लागू कीयानास्के साहस ओसो दढ़ता तोहनोरे सच्चा साम्यवादी नेताल मंदिंतोर। स्वतंत्र रूप ते कठोर समस्यांग किन हल कीयानास्के ओसो तम्मा निर्णय कुना पूरा जिम्मेदारी खुद एतनास्के नियुक्त कीयाना कैडर सही इसाब ते विकसित आंतोर।

चौथा - वर्ग दुश्मन ता विरुद्ध संघर्ष ते अनुशासन ओसो साम्यवाद किन कठोरता ते लागू कीयाना संगे-संगे साम्यवाद दिशा ते हंजी हल किया परवा विरोधी रुझान कुना खिलाफ आयना संघर्ष लोप्पा दढ़ता ते डटेमासी मंदाना ओसो सच्चा बोल्शेविक बनेमायना।

कैडर लोरा सही चुनाव कीयानास्के पोरो वेहता पोल्लोंग पोरो ज्यादा जोर हियाना। बारांकु इत्तेके व्यवहारिक रूप ते बेस रासा परना ओसो बेस वड़का परना मानेय किने महत्व हियमूडांता। मति इदु काम किया परवो ओसो दूसरा कामरेड्स ना तुलना ते संघर्ष लोप्पा योग्य वेने मन्नोर आंतोर। बाकी कामरेड्स वीरा लेक्का बेस वड़काला लेवेके रासला परवोर आंतोर। मति ओरु बहादुर कामरेड्स मंदितोर। जनता संगे कलियसी काम कियानोर, बेस संपर्क तासनोर ओसो लड़ाई लोप्पा दायना ताकत वेने तासिंतोर, लड़ाई लोप्पा दूसरोरा नेतृत्व वेने बेस किया परिंतोर। मति ज्यादातर वड़कना-रासा परना लेक्कटा कामरेड्स नाए चुनाव आयनदु दिसिंता। अतिवादी, सिद्धांत वितंडबाजी, नियम कुन कंठस्थ कीसी केंजी कियानोर-जमा आसी सच्चा ओसो ईमानदार सर्वहारा वर्ग नेता ओसो विनयशील आसी लोकुरा लोप्पा काम कीयाना कैडर किन उंदी ओदा वाटसियाना घटनांग सैकड़ों मंतांग।

मना नेतृत्वकारी कैडर लोर बाता कीयाना- इदिना बारे ते ग्यान किन साम्यवादी शक्ति ओसो क्रांतिकारी ताकत संगे पूर्ण कीसोरे पोरो वेहता पोल्लोंग किन बोल्शेविक ग्यान संगे जोड़े कीयाना।

कामरेड्स, मीटु पुत्ता लेक्का कैडर तम्मा सर्वेत्तम शिक्षा-संघर्ष लोप्पा, मुश्किल कुन वेंडना परिक्षांग लोप्पा पास आयला ओसो व्यवहार ते वायना संभव मंदाना ओसो संभव हिल्वा उदाहरणकु दोरकी कींतोर। हड़ताल लोप्पा प्रदर्शन ते, जेल ओसो कोर्ट लोप्पा कैडर लोरा जबरदस्त व्यवहार मत्तादु सैकड़ों उदाहरणकु मंतांग। मनगा, डरपोक, दढ़ता ता कमी ओसो संघर्ष तुकू वेरियसी वित्तनोरा संख्या कमी मंता। माटु पोरो वेहता सही ओसो गलत उदाहरणकुन मरंगसितोम। इव उदाहरणकुन मनम लोकुरा मुन्ने तासोम आंतोम। इविना लोप्पटल बदिन मानेयमायना ओसो बदिन तिरस्कार कीयाना इंजी वेहोम आंतोम। वर्ग संघर्ष, पुलिस जांचपड़ताल,

जेल, कैंपकु ओसो कोर्ट कुना लोप्पा माटु मना कामरेड्स लेवेके लड़ाकू लोरा व्यवहार ता अध्ययन कीयाना। बेसता उदाहरणकुना वेहच ते तत्ताना ओसो नकल कियाला काजे अदिना उदाहरण लेक्का तासना। अंगडम ता गैर साम्यवादी ओसो रुची हिल्वा मत्तादिन वाटसियाना।

मनगा तम्मा बयान संगे कोर्ट लोप्पा उंदी वास्तविक साम्यवादी व्यवहार बद्रम मंता इंजी तोहता कामरेड्स वेने मंतोरे। वीरू बेहरा संख्या ते जबरदस्त समझदारी संगे कैडर लोर मुन्ने वाया मंतोर इंजी वेने तोहतोर।

मति, मना पार्टी लोप्पा बचोन लोकुर इव उदाहरण कुना जानकारी तासिंतोर, इद सभा लोप्पा वाता मीवा लोप्पटल बचोन लोकुर पोरो वेहता उदाहरण कुना बारे ते पुंजी मंतिर?

मनम इद्रम ता सच्चा श्रमजीविरा वीरता ता उदाहरण कुन ज्यादा से ज्यादा प्रचार कीयाना। मना श्रेणिंग लोप्पा वायना वेर्री, समझदारी हिल्वा मंदाना रुझान ओसो सब्बे रकम ता चिकला ना तुलना ते पोरो वेहता पोल्लोग तोहताद मंता।

कामरेड्स, मना पार्टी नेता लोर ओरगा जरूरत अनुसार लोकुर हिल्लेर इंजी शिकायत कींतोर। आंदोलन ओसो प्रचार कार्य काजे लोकुरा कमी मंता। समाचार पत्र लोप्पा मजदूर, संगठन लोप्पा युवा लोरा लोप्पा ओसो महिला लोप्पा काम कियाला काजे लोकुरा कमी मंता। इदिना जवाब ते लेनिन इंतोर - “इगा लोकुर हिल्लेर मति इगा हालनाचोन लोकुर मंतोर। इगा बेहरा संख्या ते लोकुर मंतोर। बारांकु इत्तेके मजदूर वर्ग ओसो समाज ता वेल्ले पेरके अरता लोकुर हर साल तम्मा स्तर तुकू मुन्ने दांतोर, अनि दुक्कम ते मत्ता लोकुरा संख्या बेरसी कींतोर, विद्रोह कियाला तैयार मंदिंतोर। वीरू विरोध कियाला तैयार मंदिंतोर। हर रकम ता सहायता एतला तैयार मंदिंतोर। लड़ाई लोप्पा डेयला, सहेमाया परवा लेक्कटा यातनांग किन वेने इद्रम ता लोकुर सहेमायला तैयार मंदिंतोर। मति इंजे सब्बे लोकुर निरंकुशता बचोन सहेमाया परवा लेक्का मंता ओसो बचोनी नोमुर् हियानदु मंता इंदानदु पुत्ताद हिल्ले। मति लोकुर इंजे तीरम-तीरम समझेमाया मंतोर। इद्रम लोकुर मंतोर, मति वीर किन व्यापक संगठन ता डोरी ते दोहतना नेता लोर हिल्लेर। मनगा राजनीतिक नेता लोर हिल्लेर।

मनगा समझदार ओसो योग्य संगठक लोर हिल्लेर। होंग आसी विद्रोह कीयाना जनता किन काम ते वाटना कार्यकर्ता लोर हिल्लेर। सब्बे तोर किन इनपड़े अंगड़म समझेमायना मानेय किन वेने काम ते वाटा परना नेता लोर हिल्ले।”

लेनिन ना पोरो वेहता पोल्लोग किन मना पार्टिंग पूर्ण रूप ते लागू कीयाना ओसो मना रोज ता काम लोप्पा इविन मार्गदर्शक लेक्का लागू कीयाना। इगा लोक्कुर हालनाचोन मंतोरे, ओरकिन चीनेमायना जरूरत मंता। हड़ताल, प्रदर्शन, बचोनो संगठन कुना संयुक्त मोर्चांग तेंडनास्के वीरे लोक्कुर मुन्ने वायनूर। वीर किन मना निजी संगठन लोप्पा शामिल कीयाना जरूरत हिल्ले। काम ताकनास्के, संघर्ष कीयानास्के वीर किन मुन्ने दायला काजे मदद हियाना। वीर किन निज्जम ते मजदूर लोरा काम वायना जागा ते तासना।

कामरेड्स माटु साम्यवादी लड़ाकू लोक्कुर आंदोम। माटु मेहनतकश लोक्कुर आंदोम। पूंजीवाद खिलाफ लड़ेमायनोर आंदोम। फासीवादी साम्राज्यवाद खिलाफ लड़ेमायना ओसो पूंजीवाद ता मोदोल कोय्यला काजे संघर्ष कियानोर आंदोम। इव सब्बे काम काजे कैडर लोर किन ट्रेन कीयाना। इद्रम ता कैडर लोर किन क्रांतिकारी सिद्धांत संगे संपन्न आयना जरूरत मंता। बारांकु इत्तेके क्रांति संबंध ते मना महान गुरुजी स्टालिन क्रांति किन व्यवहार ते जोड़े कीयाना काम ते रम्मेमायनोर किन सिद्धांत उंदी सही मार्गदर्शन हींता इंजी वेहितोर। स्पष्ट दूरदर्शिता मना कार्य विश्वास ओसो मना लक्ष्य पूरा आयना बारे ते पूर्ण विश्वास पुट्टिह कींता।

वास्तविक क्रांतिकारी सिद्धांत सब्बे गलत सिद्धांतकार ओसो सब्बे पोल्ले आदर्श कुना विरोध कींता। “मना सिद्धांत हठवाद आयो। इदु मनम कीयाना कार्य तुकू मार्गदर्शन कींता।” इंजी लेनिन वेहतोर। मना कैडर लोरा काजे इदे सिद्धांत ता जरूरत मंता। कैडर लोरा काजे तिंदना-उंडना बचोन जरूरत मंतायो अचोने सिद्धांत वेने जरूरत मंता।

वास्तविक रूप ते खतरनाक ओसो अंगड़म योजनांग ओसो वत्तले बुद्धि तुन विड़चतेके ओरकिन क्रियाशील रूप ते कास्ता कसेर संगे पोरो वेहता रेंडु गलत रुझान कुन पोत्तिह कींतोर। अनि लोक्कुरा हट्टा संगे हट्टा

काल्पसी संघर्ष हर्दे मुन्ने ओसोरे लगातार संघर्ष संगे मार्क्स, एंगेल्स, लेनिन ओसो स्टालिन ना शक्तिशाली ओसो उपजाऊ शिक्षा एतसी पोरो वेहता गलत रुझान कुन नष्ट कींतोर।

इद्रम कीयानास्के नन्ना पार्टी स्कूल कुना कार्य पद्धति बगिल मीवा ध्यान पिङ्गना इंजी आल्सा मंतान। मना पार्टी स्कूल कुना लक्ष्य पोथी पढ़ेमायना पंडित, सिद्धांतकार ओसो ग्रंथ कुन रट्टे कियानोर किन तैयार कीयानादु हिल्ले। इव स्कूल कु सर्वहारा वर्ग ता लड़ाई लोप्पा सबसे मुन्ने नितसी लड़ेमायनोर किन तैयार कीयाना। वीरू तम्मा साहस, हिम्मत संगे सब्बे त्याग कियाला तैयार मंदानाए आयवा श्रेणि ना बाकी कार्यकर्ता लोरकिनकु वीरू सर्वहारा वर्ग ता मुक्तिमार्ग तुन बेस समझेमायनोर ओसो तम्मा दूरदर्शिता मंदना कारण ते सबसे मुन्ने नितसी लड़ेमांतोर। कम्युनिस्ट इन्टरनेशनल ता सब्बे विभाग लेट किवा तुरंते पार्टी स्कूल किन सही तरीका ते ताकी कीयाना कार्य कैदे पोयना। पार्टी स्कूल कुन लोहा भट्टी लेक्का बने कीयाना अनि ताना लोप्पा तपेमासी मना कैडर पड़ियोर बनेमायनोर।

इंजे नन्ना मना पार्टी स्कूल कुना प्रधान कार्य, पार्टी ओसो युवा साम्यवादी संघ ता सदस्य लोरकिन अलग-अलग देश कुना ठोस परिस्थिति लोप्पा मार्क्सवादी-लेनिनवादी सिद्धांत किन बद्रम सुदृढ़ तरीका ते लागू कीयाना इंदानदु करहना इंजी आल्सिंतान। "साधारण" रूप ते दुश्मन खिलाफ लड़ेमायना तरीकाए आयवा ठोस दुश्मन खिलाफ बद्रम लड़ेमायना इंजी करहाना। इदिना काजे सिर्फ लेनिनवाद लोप्पा बाता रास्तद मंता इंजी हूझानादे हालो आंता। इदिना काजे लेनिनवाद ता जिंदा क्रांतिकारी चेतना ता अध्ययन कीयाना ओसो लागू कीयाना जरूरत मंता।

पढ़ाई ता तरीकांग

पहला - सिद्धांत किन सिर्फ सिद्धांत लेक्का पढ़ेमायना। वत्तले ज्ञान किन ओरा दिमाग ते निहना, सूत्र, नियम ओसो प्रस्ताव कुन सुंदर ओसो साहित्य शैली ते रासना प्रैक्टिस कीयाना। सिर्फ उचुक खास देश कुना समस्यांग किन अगाटा सर्वहारा वर्ग इतिहास किन अगाटा पारंपारिक

रीति-रिवाज कुन अव खास देश कुना कम्युनिस्ट पार्टी ता अनुभव किन बिल्कुले अलग तरीका ते वेहाना- तरीका इदे आंदू।

दूसरा - सैद्धांतिक प्रशिक्षण लोप्पा मार्क्सवाद-लेनिनवाद ता मौलिक सिद्धांत ता प्रधानता तन्ना देश ता मेहनतकश लोरा संघर्ष ता मूल समस्या ता अध्ययन छात्र लोर कीयाना व्यावहारिक अध्ययन पोरो निर्भर आसी मंदाना। तम्मा व्यावहारिक काम पोरो वायनास्के छात्र लोर तम्मा धुरी स्वतंत्र रूप ते परहकना अनि वर्ग-दुश्मन विरुद्ध लड़ाई लोप्पा जन समूह लेवेके नेतृत्व कियाला तैयार मत्ता वरोर स्वतंत्र व्यावहारिक संगठनकर्ता ओसो नेता लेक्का बनेमायना।

मना पार्टी स्कूल ता सब्बे स्नातक योग्य साबित आया परवोर आंतोर। इगा वेल्ले बेहरा स्तर ते हट्टोंग, आदर्श, किताबी ज्ञान ओसो ज्ञान ता प्रदर्शन आंता मति मन किन वरोर सच्चा साम्यवादी संगठनकर्ता ओसो जन नायक लोरा जरूरत मंता। नेता परिस्थिति ते ओना वेल्ले जरूरत मंता। इद्रम ता विद्यार्थि बेसता लेख रासा परवेके बाताले आयो। बारांकु इत्तेके मना किन इद्रम तोरा वेने वेल्ले जरूरत मंता। मति ओरकिन संगठित ओसो नेतृत्व कीयाना, मुश्किल कुना पोरो वेरियवा वेला अविन काबू कीयाना जानकारी जरूरी मंदना। क्रांतिकारी सिद्धांत क्रांतिकारी आंदोलन ता निष्कर्ष ओसो संक्षेप्त अनुभव मंदाना। साम्यवादीर तम्मा देश लोप्पा सिर्फ पाइना अनुभव कुने इस्तेमाल कीयानायो, अंतराष्ट्रीय मजदूर आंदोलन ता बाकी वर्तमान संघर्ष कुना अनुभव कुना वेने इस्तेमाल कीयाना। बदे रकम ता अनुभव ता सही इस्तेमाल कीयाना इत्तेके यांत्रिक उलटफेर आयो, संघर्ष रूप ते ओसो आकार लोप्पा उंदी चरण तल दूसरा चरण एवनल उंदी देश तल दूसरा देश एवनल मना पार्टिंग लोप्पा आसोर मत्ता लेक्का आयना।

खुला अनुकरण, तरीकांग ओसो आकार कुना साधारण नकल सोवियत रूस कम्युनिस्ट पार्टी ता काम लोप्पा, पूंजीवाद देश कुना लोप्पा, उंदी बेहरा लक्ष्य पूरा कीयाना संगे बेस मंदाना तुकू ज्यादा खतरनाक मंदितांग। हमेशा आता लेक्का। रूसी साम्यवादीरा अनुभव संगे माटु जरूर करियाना, पूरा कोशिश संगे काम कीयाना, हर देश ता विशिष्ट पिस्वल, उंदे

अंतरराष्ट्रीय दिशा, पूंजीवाद विरुद्ध संघर्ष लोप्पा कूर व्यवहार, सामान्य उपहास ओसो छीटिकसी किन सहन कीयाना लेवेके घिसे-पिटे सुत्र, पांडित्य ओसो आदर्शवाद ता इस्तेमाल कीयाना इंजी स्पष्ट आता।

करियाना वेल्ले जरूरत मंता। कामरेड्स हमेशा करियाना हर कदम ते संघर्ष ताकनास्के, स्वतंत्रता लेवेके जेल लोप्पा वेने करियसोरे मंदाना। करियाना ओसो लड़ेमायना, लड़ेमायना ओसो करियाना। माकिन मार्क्स, एंगेल्स, लेनिन ओसो स्टालिन ना महान विचार कुन काल्पसोर ताकना लेक्का करियाना, संघर्ष ओसो काम पोरो स्टालिनवादी दृढ़ता, समस्यांग पोरो स्टालिन वादी निर्विवाद विचार, वर्ग-दुश्मन ओसो साम्यवादी दिशा ता भ्रष्ट लोकुरा मुन्ने स्टालिन ना सिद्धांत, मुश्किल कुना मुन्ने स्टालिनवादी निडरता ओसो स्टालिनवादी क्रांतिकारी यथार्थवाद लेक्कटवु करियाना।

अनुवादक ना बगिल तल

11-12 साल उमर ते मंदानास्केटल बेहरोर वड़कना पोल्लोग केंजसोरे बेरसतान। बेरसोरे दायना संगे इव पोल्लोग कुन पाटांग ओसो भाषण कुना लोप्पा वेने केंजा वात्ता। नन्ना सुडलास्केटल मंदाना नाटे ओसो नावा नालुंग बगिल ता वातावरण लोप्पा इद्रम ता बेहरा-बेहरा ओसो मावा रोज ता पिस्वल संगे जुड़ेमासी मत्ता पोल्लोग केंजवा मत्तांकु, नावा लोप्पा इविन पुंदाणा गिर्दा बेरससोर हत्ता। नावा काजे इव वेल्ले पूना पोल्लोग मत्तांग।

सिर्फ केंजसिए बदे पोल्लो तुन पुंदाला कोशिश कियाना वेल्ले मुश्किल मंता। बारांकु इत्तेके हर बेरा, हर विषय, हर सवाल ता जवाब हियाला काजे वरोर सही मानेय संगे मदांन मुश्किल मंता। अदिनके नन्ना उचुन पढ़ेमायला अनि रासिला करियतान।

नावा इद यात्रा लोप्पा वेल्ले लोकरा योगदान मंता। सबसे मुन्ने नावा यायाल मंता, अदु नाकिन कम से कम साईन कियानाचोन स्कूल करियाना इंजी सपना हूइता। मति अदिना सपना अदु हूइता लेक्का पूरा आया परवो आत्ता। बारांकू इत्तेके उंदी पेरके अरसी मत्ता इलाका ओसो नाटे स्कूल-कालेज पढ़ाई ता रिवाजे हिल्ले। इदिनकु बेहरा समस्या गरीबी ते पिस्वल पिस्नदु मंता।

इद्रम ता परिस्थिति ते मंदानास्के नावा पिस्वल लोप्पा वरोर गुरूजी वात्तोर, नावा जीवा ता 'दादाल', नावा गुरूजी। ओरु नाकिन ओरा वेल्ले कीमती समय तिंची नावा काजे समय तेंडानोर, नाकिन प्राथमिक शिक्षा हियानोर, नाकिन जीवा कियानोर। नावा जीवा गरे मत्ता 'मीना' दीदी नाकिन हिंदी भाषा रास्ला ओसो पढ़ेमायला करिहत्ता। इदे आयवा 'गेड़ा ते ताकना स्कूल' ता वेल्ले योगदान मंता। इदे आयवा बच्चोने दादा-दीदीरा योगदान मंता। इव सब्बे पुस्तकिंग अनुवाद कीसोरे ओर सब्बे तोरकिन नन्ना सुरता कींदान। ओरा लोप्पा बच्चोने जन इंजे माकिन विड़िसी हत्तोर। वेर सब्बेतोर इद यात्रा लोप्पा नावा संगे मंदानोर, ओसो वायना कालम ते वेने नावा संगे मंदानूरे। ओरा बारे ते बच्चोने पुस्तकिंग रासमुड़ आयर।

माटांग ओसो पाटांग लोप्पा केंजता पोल्लोग, पुस्तक पढ़ेमायनास्के पुस्तक लोप्पा दोरकतास्के नावा गिर्दा तुकू हंदी हिल्ले आत्ता। नावा लेक्का पूना पोल्लोग करियाला आल्सानोर ओसो केंजता पोल्लोग कुन पुंदाला

कोशिश कियानोर वेल्लेतोर मंतोर। मति पोरो नन्ना वेहता लेक्का हर बेरा, हर विषय, हर सवाल ता जवाब हियाला सही मानेय 'जीवा ता दादाल' दौरकना मुश्किल मंता। अदिनके इद साहित्य ता परताचोन हिंदी तिंची गोंडी भाषा ते अनुवाद कियाना इंजी आल्सतान।

मावा गोंडी भाषा वड़कानोर आंध्रा, ओड़िशा, छत्तीसगढ़, महाराष्ट्र, मध्यप्रदेश, उत्तरप्रदेश लेक्कटा राज्यकुने अलग-अलग जागा ने पिस्सा मंतोर। अदिनके मावा गोंडी भाषा पोरो अलग-अलग राज्यकुना भाषांग ना वेल्ले प्रभाव मंता। नावा गोंडी पोरो हिंदी, मराठी ओसो छत्तीसगढ़ी ता प्रभाव ज्यादा मंता। अनुवाद कियानास्के नाकिन पूना शब्द बने कियाना वेल्ले कटला वात्ता, इत्तेके गोंडी लोप्पा पारिभाषिक शब्द कुन वेहाला शब्द हिल्ले, अदिनके वेल्ले शब्द हिंदी ता इस्तेमाल कित्तान। वायना कालम ते जनता लोप्पा हंजी ओसो ज्यादा गोंडी ता शब्दकु करियसी इदिन उचुन सुधरे कीमुड़ आयर। मति भाषा ता प्राकृति अनुसार दूसरा भाषा तल शब्द पोयाए लागिंता। अनुवाद कियानास्के नन्ना अंग्रेजी ओसो हिंदी रेंडु पुस्तकिंग ना मदद एतित्तान।

नावा इद कब्बड़ लोप्पा संगे-संगे ताकसोर मत्ता नावा जीवन साथी ना वेन्ने योगदान मंता। वीरू नाकिन इद काम कियाला गिर्दा कींतोर। नावा लोप्पा जीवा मत्तादु सुरता किसींतोर, नावा कै पोयसी ताकिंतोर। वीरू इदिन पुस्तक लेक्का डिजाईन कियाना ओसो प्रूफ कियाला मदद हित्तोर।

इव सब्बे पुस्तकिंग जनता नड़मा ओयला काजे जंगोम प्रेस पोरोल ते उंदी प्रकाशन पोरोल हित्तोम। इद पोरोल मावा वीर पड़ियोर, गोंड जनता ना हीरो, गड़चिरोली भूमि ता मरी वीर बाबूराव शेड़माके ना सेना तल पोयत्तोम। सब्बे शहीदीर किन सुरता कीसोरे इव सब्बे पुस्तकिंग इंजे मीवाव आत्तांग।

इद यात्रा जारी मंदियर.... इव पुस्तकुना गोंडी अनुवाद, डिजाईन पोरो सब्बेतोरा सुझाव ओसो आलोचनाकुना वेल्ले जरूरत मंता। मीटू ओसो बदे पुस्तक ता अनुवाद कीतेके बेस आयर इंजी वेने सुझाव हीतेके बेस आयर।

जीवा ता जोहार
मीवा - जनी

“

उंदी राजनैतिक पार्टी ता तन्ना गलतिंग पोरो मत्ता दृष्टिकोणे अदु बचोन गंभीर दृष्टि वाले पार्टी मंता इंजी वेहिंता। अद पार्टी ता व्यवहारे पार्टी तन्ना वर्ग, सर्वहारा जन समूह काजे मत्ता तन्ना कर्तव्य तुन पालन कियाला बचोन दृढ मंता इंजी वेहा परिंता। इद विषय लोप्पा इगा मत्ता पार्टी ता व्यवहारे बेजोड़ प्रमाण मानेमायमूडांता। तन्ना गलतिंग किन स्पष्ट रूप ते चिन्हित कीयाना, अव गलतिंग ना कारण तुन तोहना, बद परिस्थिति ते गलतिंग आंतांगो, अविना विश्लेषण कीयाना ओसो अव गलतिंग किन सुधरे कीयाना तरीकांग ना बारे ते चर्चा कीयानादे इद पार्टी ता गंभीर लक्षण आंदू। इव लक्षणकु अद पार्टी तन्ना कर्तव्य ता सही पालन कींता इंजी सबूत हींतांग। अद पार्टी इद्रमे तन्ना वर्ग ओसो जन समूह किन चेतनापूर्ण शिक्षा हींता।

”